

東
華
續
錄

東華續錄

嘉慶二十二

臣王先謙敬編

臣周瀚著恭校

秋七月丙午朔諭本日恭閱 皇考高宗純皇帝實錄乾隆五十七年前任伊犁將軍保甯奏伊犁兵丁皆習用八力弓每遇挑缺不能開八力弓者皆不入選欽奉 諭旨人力各賦於天強弱不同步射不在弓力軟硬惟期發必命中保甯見不及此止令兵丁習用硬弓徒沽虛名不求實效保甯著申飭欽此我 皇考高宗純皇帝騎射步射超邁千古天下無不欽服而於 訓示臣工操演兵丁 諭旨深切著明實當永遠遵行前於嘉慶七年據前任喀什噶爾參贊大臣富俊奏請嗣後八旗各營挑選前鋒護軍非用八力弓不准挑選等語朕卽以爲斷不可行將富俊申飭並特

將難行之故曉諭八旗各營去歲朕巡幸盛京閱看該處官兵布靶中三箭者僅止一人吉林官兵中箭者甚多並非俱用硬弓是步射優劣全不在弓力強弱盛京官兵所以未能多中布靶者總由富俊迂謬教以硬弓是以不能善射徒事虛名而無實用朕前訓示富俊之旨洵與 皇考高宗純皇帝訓示保甯 聖諭前後相符著再通行曉諭八旗各營各省將軍副都統等各將所屬官兵步射騎射實力訓練但期精銳切勿徒用硬弓轉致失其準的也○辛亥諭前據松筠達慶奏體察哈薩克窮苦情形請將塔爾巴哈台北山烏里雅蘇台遼東每年秋開設卡之處著爲定地夏季不復展放俾得常年在於該處遊牧以資調劑一摺朕披覽之下卽覺其事不可行因思大學士保甯慶桂尙書明亮長麟均在新疆辦事有年熟悉該處情形令其會議具奏本日據保甯等具

奏以邊防經畫未可輕議更張請旨飭駁等語所駁甚是哈薩克部落本各自有遊牧之區不應進至天朝邊界從前因哈薩克生計窮苦特於每年冰凍後將額爾齊斯河雅爾等處各卡稍向內那准其在彼遊牧至春融雪化之後始將各卡展至原設處所驅令出外實屬格外施恩今松筠等又以該哈薩克近來窮苦益甚欲將夏季展設邊卡之處一併停止使得常川遊牧無論哈薩克窮苦之故實緣連年風雪災傷不善牧養是以較前苦累非由每年搬徙所致且以天朝兵力平定之地竟委爲哈薩克常年遊牧之區將來年復一年哈薩克將視爲己有而附近之布魯特等設亦相率效尤紛紛呈請又何以塞其無厭之求此於新疆一帶邊務大有關係達慶尙係甫經到彼松筠則在新疆駐紮有年情形較熟此奏必係松筠主見伊素喜市恩邀譽今於塔爾巴哈台展

卡一事冒昧具奏尤屬不合除所奏不准行外伊二人均著傳旨
申飭松筠並著交部議處達慶著交部察議○癸丑諭昨禮部將
新修則例進呈朕詳加披閱全書尙無謬舛惟皇子祭 陵典禮
條內載皇子蟒袍補服由 隆恩門右門進至階上虛中位於左
旁行禮一節係屬錯誤皇子祭 陵係屬特遣恭代向來朝服將
事朕從前恭代 皇考行禮卽係朝服此儀親王等所共知惟皇
子內有年幼未蒙賞賜朝服者則穿用蟒袍此外執事各員仍均
一體穿用朝服惟應於則例內加註聲明方爲詳備至皇子恭代
行禮處所係在丹陛上居中並無虛中位於左旁行禮儀注禮部
憑何記載纂入則例著卽詳查更正再行進呈○乙卯減直隸新
安等六縣積水地賦則○辛酉諭軍機大臣等方維甸等奏甯陝
鎮標兵丁二三百名滋事搶掠前往查辦一摺甯陝鎮新募兵丁

多係鄉勇改充早慮及伊等不能安靜甯貼今竟藉停止米折爲
辭糾集二三百人爬進該廳舊城搶掠又復竄赴新城教場屯聚
可恨已極方維甸接據該廳稟報後卽與扎勒杭阿面商密派滿
營兵一千名提標兵一千名撫標名五百名豫備調遣並咨會總
兵王兆夢副將祝廷彪各豫備兵五百名分投堵拏先令總兵楊
芳帶兵二百回陝所辦俱是楊遇春由川進京行抵西安聞知甯
陝鎮兵丁滋事之信卽會同帶兵馳往查辦能以公事爲重殊屬
可嘉卽著方維甸楊遇春二人進山督率辦理扎勒杭阿見已年
老祥保亦未經歷行陣應令蘇勒芳阿帶兵前往儘見調之兵不
敷辦理卽於陝省各營擇其曾經打仗者再爲調派此時方維甸
等當一面派兵堵截一面派明幹文武大員前往曉諭以該兵丁
仰荷豢養生成至優極渥卽以米折一項業經奏蒙聖恩給與折

銀四錢此時各鎮新兵安分守法卽當將米折之項分別給予爾等有何迫不及待竟敢肆行搶劫此實罪由自取但其中必有起意爲首之犯其餘多係徧脅附和若能將罪魁縛獻則此內爲從之犯卽可貸其一死儻皆不畏法尙不自行投出卽當調派各路大兵擒剿無赦如此明白宣示如該犯等將爲首各犯獻出卽當嚴行究辦其業經爬城肆搶者俱應正法此外尙可從寬發遣儻竟敢相率抗拒卽當併力剿辦大示懲創勿令日久蔓延致滋裹脅○癸亥陝西甯陝鎮新兵陳達順等糾黨戕官攻陷洋縣並擾及城固等境命德榜泰往剿之○丁卯 上啓鑒秋獨木蘭○免經過地方額賦十分之五○庚午大學士慶桂等議覆侍郎英和等會議山西等省鹽務情形晉省商人賠累實緣原議以賤價定爲常額請照乾隆十年前成例令該商等按收鹽豐歉成本重輕

自定賣價仍令該撫等將各處售賣鹽斤實價按月造冊報部俟
試行一年再行酌中定價吉蘭泰鹽斤向用船隻由黃河運至山
西行銷若定由木商造船轉給運商難保無藉勒情弊應令運商
自行購造方足以資輓運又運商應帶口糧官爲驗放但出口人
數多寡視該處產鹽旺歉難於豫定額數自應隨時造報不准浮
多又河東鹽政照舊以山西巡撫兼管所有河東運使無庸復設
應卽以河東道兼辦鹽法道事務其吉蘭泰鹽斤卽令甯夏道兼
管鹽法道辦理並令該督於丞倅中酌量一員在該處輪流駐紮
以資查察其陝西鹽務仍照舊令鳳邠道兼鹽法道管理統由山
西巡撫覈轉至所請磴口添設通判一員吉蘭泰及磴口各設鹽
大使一員河口鎮添設批驗所大使一員以及派委武職彈壓之
處應如所奏辦理從之○癸酉 上駐蹕避暑山莊○命嗣後秋

猶如遇雨水稍大密雲古北口內外潮河各橋座著密雲副都統古北口提督熱河副都統率領官兵幫同修搭著爲例○以繫納爲陝西按察使

由糧道遷

○甲戌江南宿南廳郭家房河溢

八月癸未浙江提督李長庚奏拏獲蔡牽幫另船盜首李按並夥匪盜船礮位器械得旨李長庚追捕蔡牽日久未經奏有捷音此次不過小得勝仗其殲擒者止係另船夥匪且據該提督摺內奏稱行抵三盤已失盜蹤若果緊躡何至失蹤是官兵距賊較遠之明證著清安泰再行嚴催李長庚等務卽確偵賊蹤上緊躡捕○撥山西藩庫銀四十萬兩備陝西軍需○乙酉諭承德府爲每歲巡幸木蘭駐蹕之區民物豐饒駸駸向學自 皇考高宗純皇帝建立黉序 聖製碑文昭垂久遠彼時生員共止五十餘人定取鄉試中額一名曾經欽奉 諭旨俟將來人數增多再當加恩增

額本年朕蹕臨熱河見接駕諸生人數濟濟卽交軍機大臣查明該府閩屬生員實數見據稱查明統計四百餘名人文曰威殊堪嘉慰著加恩於承字號中額一名外廣額二名每科鄉試取中舉人三名以示朕仰承 教澤嘉惠烝髦至意○丙戌諭軍機大臣等據阿林保奏蔡逆幫匪船復竄回閩飛催許松年統帶舟師迎頭截擊各緣由辦理均屬得宜但昨據該督奏稱拆閱李長庚致溫承惠書函有七月初十日將兵船收進定港裝蓬燭洗購備口糧之語因疑其私行回署又稱追至盡山洋面盜船竄往極東洋不能剿捕初五六七等日見盜船遊奕扼住上風何以忽稱探聽無蹤特將李長庚密摺參奏請革職治罪經朕降旨訓示以阿林保所奏均係揣度之詞且於李長庚所奏七月二十一日在大陳調班等洋面攻剿盜船生擒盜首李按及殲斃夥盜多名一事

尙未知悉是以諭令清安泰確查李長庚是否有心玩誤私回衙署捏飾奏報情事據實陳奏本日摺內又稱李長庚玩誤縱賊是該督之意必欲將李長庚參革治罪太存成見矣帶兵大員如果查有玩誤確據朕豈肯稍從寬宥近年辦理教匪因玩誤而獲罪者甚多然彼皆有實據是以不稍寬假朕非庸闇之主豈肯以真須有入人重罪乎今該督前後所奏總不過懸揣之詞毫無實蹟卽如李長庚所奏生擒李按一事適據清安泰奏到情形均屬相符並經委員將李按訊供知蔡逆另坐大船脫逃其起獲礮位器械等項均係確鑿若如該督所奏疑其私行回署則李按一犯又從何擒獲卽云李長庚飾詞誑奏豈清安泰亦從而附和乎看來阿林保竟係先存意見不自知其言之無據朕於李長庚從未識面豈復稍有袒護惟督勦蔡逆一事經朕特派統領舟師該提督

銜風涉浪已閱數年豈能以該督懸揣虛詞遽繩以法試思此時

卽將李長庚疏問將治以何項罪名且將伊治罪後又責令何人

統領舟師剿賊豈不轉致遲誤外省文武大吏總在和衷商榷若

稍存私見動掣其肘以致日久罔功固當嚴治李長庚之罪該督

亦豈能置身事外阿林保所奏實屬冒昧輕率著傳旨申飭○庚

寅 上自避暑山莊巡幸木蘭行圍○姜晟因病解任以汪志伊

爲工部尙書調汪日章爲江蘇巡撫以恩長爲廣西巡撫李鉉爲

廣西布政使常明爲山西按察使

由湖北
鹽道遷

○辛卯以豐紳濟倫爲

盛京兵部侍郎

由四等
侍衛遷

○乙未諭本日裘行簡奏藩司查出司書

假雕印信串通銀號虛收解款舞弊侵用緣由一摺並據慶格同

日具奏究出司書私雕假印句串舞弊緣由據稱司庫歷年出入

銀數夥輻不清司書狡黠枝梧因弔齊冊檔案據詳悉稽裏查出

歷年地糧耗羨以及雜稅銀兩均有虛收之款隨又親提各州縣奉到司發批收逐加覈對竟有假印貼改諸弊隨查傳承辦司書王麗南等隔別研訊歷年以來該犯等有將司發庫收小數貼改大數者有將領款抵解錢糧又蒙混給發者有串通銀匠給與假印批收者爲弊不一共虛收過定州等十九州縣地糧正耗雜稅等銀二十八萬餘兩並起出漕司及庫官假印二顆等語直隸司書王麗南等敢於私雕藩司及庫官印信與銀匠等串通舞弊將各州縣批解銀糧任意侵盜數至二十八萬餘兩之多作奸犯科至於如此爲從來未有之案實出情理之外案關重大不可不嚴行根究辦理示懲著派協辦大學士尙書費淳尙書長麟帶同明幹司員卽行馳驛前赴保定查明款項提集犯證逐一嚴訊秉公定擬具奏其畏罪潛逃之司書陶源卽陶含輝著該督等卽行嚴

學務獲歸案辦理至此事該司書等串通侵盜舞弊有年將庫項種種糾纏以致漫無稽考該藩司慶格於到任後悉心查覈詳細句稽今將弊混查出認真可嘉慶格著加恩交部議敘該藩司摺內稱拜摺後查勘河工同至省城將要件趕緊清釐卽赴密雲查道迎駕等語見在省城有此重大之案卽日欽差到彼正須督同該藩司詳悉查辦所有回鑾時查看道路橋梁等事計彼時裘行簡堵築漫口查勘隄工早經完竣自可前來行在照料慶格著無庸前赴行在於何處接奉諭旨卽於何處回省俟費消長麟到彼隨同審辦○丙申諭軍機大臣等方維甸等奏洋縣知縣曾彰泗於賊匪攻城時經軍功等接令逃避該令堅不肯行旋被賊匪執縛脅令同行該令大罵賊匪縛赴城隍廟湯泡火烙身受多傷罵不絕口而死曾彰泗深知大義慘遭戕害實可嘉憫著加恩照知

州例各部賜卹並著於事竣後設立牌位於城隍廟之配殿春秋

官爲致祭載入祀典○庚子定殺死一家三命分均卑幼斬梟例

○癸卯明志緣事降調轉廣興爲兵部左侍郎調多慶爲兵部右

侍郎薩彬圖爲禮部左侍郎以策丹爲威京工部侍郎

由內閣學士遷

○

甲辰諭此次李長庚探明賊蹤所在追及蔡逆坐船奮不顧身直

前攻擊以致身受數傷實屬勇往不得復疑其恇怯逗留至蔡逆

此次當兵船駛擺之時先用火器長槍抵禦繼復用套梃拋擲可

見盜船火藥漸少不能如前接濟近來各海口辦理防堵尙屬緊

嚴但該逆當此鋌走之際船上火藥既盡其望接濟更殷自必多

方設法欲圖透漏該督撫尤當嚴飭各海口地方文武員弁加意

巡緝有犯必懲無許絲毫透漏方爲有益儻有透漏者從重治罪

首犯卽行絞決餘犯定擬具奏再李長庚稱該提督所坐之船爲

通幫最大及並攬蔡逆之船尙低至五六尺是以不能上船擒捕致被免脫殊爲可惜閩省兵船前據該督撫等先後奏到添造大號同安梭船以資剿捕並因大同安梭船一時趕造不及請將大號商船先行雇用卽降旨准行見當勦賊喫緊之際該督撫一面上緊籌辦大船派委將弁送交李長庚俾令乘坐追剿庶擒渠不能久稽○以懲擒海盜多名賞還李長庚頂帶

九月己酉諭費滄長麟奏審訊大槩情形並究出串通舞弊之各州縣請旨革職拏問一摺據稱司書王麗南等私雕假印舞弊營私一案查明自嘉慶元年起至本年止地丁耗羨雜款項下俱有虛收虛抵重領冒支等弊計有二十四州縣共侵盜銀三十一萬六百餘兩此內竟有與州縣講明每虛收重抵冒支銀一萬兩給與司書及說事人使費銀二三千兩不等各州縣實省解銀六七

千兩當經費等逐細研鞠按冊覈稽究出串通知情之知縣張麟書等十一員其見任者均經提傳實審各認通同舞弊屬實等語閱之殊堪駭異實爲我朝未有之事從前外省不肖官吏作奸犯科如甘肅捏災冒賑之案最爲重大然止藉辦賑爲名虛報侵肥從無有身任州縣與胥吏等勾連一氣公然將正項錢糧私雕假印空改公文虛捏報解抵冒分肥至三十餘萬兩之多若似此朋比爲奸將各直省應徵錢糧奸胥劣員得以任意乾沒綱紀何在亟應徹底訊究加等嚴行懲辦所有見已究出之知州陳錫珏知縣徐承勳陳孚蕭泗水范穀貽魏廷鑑均著革職鎖拏同已經參革之知州王威清知縣任銘獻一併鎖拏監禁交費清等悉心研審如有狡展卽當加以刑訊務得確情按律加等定擬具奏該革員等任所原籍及病故之知州張麟書知縣鄒試丁履端各原

籍貲財一併嚴密查鈔並查明該革員等子孫有捐納官職者悉予斥革其訊不知情之各州縣亦尚未可盡信仍當詳加確訊毋任稍有不實不盡以成信讞○廣興緣事降調轉多慶爲兵部左

侍郎以扎郎阿爲兵部右侍郎

由內閣學士遷

○庚戌

上駐蹕避暑山

莊○諭軍機大臣等本日清安泰奏到查明李長庚在洋捕盜並無因循懈玩一摺所論甚屬公正阿林保身任總督原不能無參劾之舉但伊到任不過旬月地方公事海洋情形素不熟悉而於李長庚更從未謀面輒行連次參奏是以降旨令清安泰秉公詳查本日據清安泰覆奏則稱李長庚帶領兵船經過海口並未回署又稱海船若不勤加燂洗則船底苔草楚蟲黏結輒致駕駛不前故隔越兩三旬卽須傍岸燂洗李長庚收船進港委非無故逗留又李長庚所獲李按實係蔡牽夥黨俱經審明確實並無捏報

斬獲情弊並據另片奏稱八月十六日李長庚帶兵圍攻蔡逆坐船將盜船燒沈二隻斃賊無算是阿林保前此參奏李長庚之處全屬子虛設朕誤信其言則李長庚正當奮不顧身爲國殄賊之際忽將伊革職拏問成何事體豈不令水師將弁寒心試問水師中有過於李長庚者乎阿林保未見確實任意糾彈殊屬冒昧朕又不昏聩糊塗豈受汝蠱惑自失良將耶李長庚平日旣無逗留恇怯情事此次在長塗洋面痛勦蔡逆身先士卒躬受多傷實爲認真出力朕已特降恩旨先行賞還頂帶以示獎勵並將勦辦蔡逆一事資成該提督勉以成功李長庚感激朕恩旣知責無旁貸自必倍加奮勉但兵船在洋捕盜全在地方官協力幫助文武和衷方克有濟今兵船正當勦捕喫緊之際若阿林保尙不知以國事爲重屏除私見猶復輕聽人言罔恤公論甚至因此次參奏李

長庚不能遂意因而心存嫉忌遇事掣肘使其不能成功以致蔡逆逋誅海疆貽誤則阿林保之罪甚大朕惟執法懲辦見在李長庚又已駛船追賊前因該提督所駕兵船較賊船低至五六尺勦捕不能得力曾諭令阿林保溫承惠清安泰在閩浙省分設法雇募大船本日據清安泰摺內亦稱此時若得高大船一二十隻即可濟用惟浙省無從雇募又據稱兵船口糧實不免暫時缺乏應需採購等語浙省既無此項高大商船阿林保等卽應速在閩省雇募迅卽解交李長庚俾資追駛其口糧火藥等事亦須源源接濟並當遵照節次諭旨認真經理將來蔡逆殲獲海疆肅清不但李長庚仰邀懋賞該督亦可一體邀恩勉之慎之○辛亥刑部侍郎莫瞻菴緣事降調○壬子撥山西藩庫銀三十萬兩備陝西軍需○癸丑諭據費淳長麟奏連日審辦直隸省官吏勾通侵帑一

案除州縣短解司書銀匠侵蝕之外尙有知情分贓之各幕友長隨人等見已咨部斥革分別提拏押解歸審又究出正定縣知縣戴書培曾經借領司庫銀一千六百餘兩經司書王麗南串通將借領案卷銷毀戴書培允從給與酬謝銀四百兩幕友余用甫索分銀一百兩已提到質審屬實又任縣知縣馬河有應解地糧銀五千兩經長隨賴錦堂串通司書以實解銀五錢誣出真印庫收空改爲解銀五千兩見在訊據賴錦堂先供官不知情又供官止給銀二千五百兩供詞兩歧等語並據查明歷任總督藩司各任內虛收銀兩數目及失察虛收銀數開繕清單呈覽知縣戴書培以借領司庫之項竟敢與司書串通將領案銷毀圖免解還私給與王麗南酬謝銀兩目無法紀至於此極實堪令人髮指前任正定縣知縣今升昌平州知州戴書培卽著革職鎖拏到案嚴訊一

面將伊任所及本籍貲財先行查鈔知縣馬河所解銀五千兩雖據長隨賴錦堂供稱係伊與司書串通以實解銀五錢將庫收空改但供詞閃爍前後不符亦應歸案嚴訊任縣知縣馬河著解任一併質訊其串通得贓之幕友長隨人等見經費浩等分別提拏均著迅速鎖拏到案嚴加根訊將來定案時均應計贓論罪再加等問擬至該省官吏幕友長隨人等敢於勾通一氣將國家正帑任意侵吞明目張膽毫無忌憚歷任總督藩司懵然不知竟同木偶所司何事爲從來未有之案朕不得不從嚴加重辦理毫無良心之歷任庸碌無能督藩實堪痛恨而朕不知人之咎惟自怨耳閱費浩等呈覽單內查出各任虛收銀兩及失察虛收數目此時懲辦之法亦應按其虛收失察數目之多寡以分其獲戾之輕重所有各藩司任內虛收之數瞻柱計有十九萬餘兩數目最多其

次卽係顏檢任內虛收六萬三千餘兩鄭製錦任內虛收二萬二千餘兩同興任內虛收二萬餘兩又均在顏檢之次其失察虛收之各總督則顏檢失察藩司虛收銀二十萬八千餘兩爲數最多胡季堂失察虛收銀六萬二千餘兩梁肯堂失察虛收銀二萬二千餘兩陳大文失察虛收銀七千餘兩熊枚失察虛收銀一千五百餘兩除病故各員外均交部分別嚴加議處顏檢本係在直隸總督任內獲咎之人經朕節次施恩棄瑕錄用賞給同知發往南河效用今伊在總督藩司任內復有此重大之案實再難曲爲寬貸顏檢著革去頂帶著鐵保派員押送來京聽候部議山西巡撫同興亦著開缺來京聽候部議張行簡在藩司任內曾虛收銀一萬一千餘兩其署督任內亦失察藩司虛收銀一萬六千餘兩但爲數較少再伊於升署總督之後因藩庫款項未清曾奏明同慶

格再行查辦尙未出結此時慶格接手查辦方能釐出弊端發行
簡免其嚴議著交部議處慶格任內亦有虛收一萬二千餘兩但
此案係伊查明舉發功過尙足相抵慶格前經交部議敘卽著撤
回議敘免其交部議處所有見在查出侵虧各數將來各任總督
藩司名下俱應分賠著費滄長麟於定案時查明各該員在任月
日並虛收失察銀數之多寡分別著賠其已故各員亦當責令各
家屬名下按數追繳至吳熊光前任總督藩司何以未列單內吳
熊光前任藩司係接鄭製錦之任所有鄭製錦虛收之數伊到任
後未經查出迨簡放總督於前任各藩司虛收銀數亦未查辦將
來結案時自有失察之咎至伊藩司本任竟無虛收之數其任總
督時亦無失察本任藩司虛收之事是否單內遺漏抑係該書吏
等因其查察較嚴不敢舞弊並著費滄長麟提集司書人等一併

訊明據實具奏尋議上得旨顏檢著革職發往烏嚕木齊效力贖

罪同興照議革職姜晟陳大文熊枚降四品京堂裘行簡革職留

任吳熊光交部議處○調成甯爲山西巡撫以初彭齡爲安徽巡

撫由內閣學士遷○甲寅撥江蘇清河等四州縣倉穀十萬石備賑○丁

巳上自避暑山莊回鑾○轉周兆基爲工部左侍郎以蔣予蒲

爲工部右侍郎邵洪爲左副都御史由宗人府丞遷○庚申以劉權之

爲左都御史由內閣學士遷○辛酉諭直隸省官員書吏人等串通侵帑

一案情罪重大節經費滋長麟嚴切根訊具得實情將各該犯從

重定擬具奏已批交行在大學士尙書侍郎速議矣藩司爲錢糧

總匯國帑攸關出納收支是其專責所有通省各州縣徵收正雜

銀兩於解到藩庫時如何收兌之處自當有一定章程慎重考察

朕近日面詢曾任藩司各廷臣僉稱各省州縣應解銀兩具批申

解俱係按款登載到省之後藩司先將來批驗明示期收納限同上兌登記檔冊然後給與批回蓋用司印並有用連環大批兼鈐蓋巡撫關防者層層考覈法甚精詳卽有不肖吏胥斷難從中舞弊至直隸省則迥異乎是州縣向來申解銀兩到省之後藩司並不親自驗收亦並不給與司印批回僅與庫官印收一紙以致司書等竟敢與解役銀匠等通同作弊將庫收任意改竄侵蝕銀兩嗣復僞刻庫官印信冒領虛收而不肖官員亦聯爲一氣銷毀借案重領虛解無所不爲迨裘行簡到任之後因庫收不足憑信改用司印批回欲以防弊而該司書等又卽僞刻藩司印信百弊叢生釀成巨案侵虧帑項至三十餘萬兩之多總由於立法不嚴杜弊不周闕茸因循至於此極不可不亟行整飭以期釐剔弊竇嗣後直隸省藩庫於各州縣批解銀兩應如何明立章程永革一切

弊混之處著裘行簡督同藩司慶格詳悉妥議具奏辦理○壬戌諭各省布政使管理通省錢糧專司出納一切正雜款項由州縣徵解到司絲毫皆關國帑自應詳慎綜覈杜絕弊端乃直隸省竟有司書王麗南等串通州縣舞弊之案虛收冒領百計侵虧甚至假刻藩司及庫官印信將國家正帑肆意私吞作奸犯科至於如此比之從前甘肅省捏災冒賑之案其蒙蔽分肥情節尤出情理之外本日行在大學士尙書侍郎等遵旨速議具奏已將情節尤重贓私較多之革員書吏等抵法矣州縣身為職官任膺民社乃甘與奸胥蠹吏勾通作弊不獨蔑視憲典亦且罔顧身家見在破案之貪官蠹吏立決者已有十名朕心實覺不忍然王章具在卽欲曲爲寬貸有所不能此案定讞悉遵照舊日 皇考高宗純皇帝辦理甘肅捏災冒賑之例分別問擬以侵盜之多寡定罪名之

輕重此實於無可寬貸之中稍示區別不爲已甚而釀成巨案實由歷任藩司於收支帑項漠不經心喪盡天良因循罔究所致試思該藩司等如果認真嚴查留心杜弊奸吏等何至如此縱恣見據查出吳熊光在直隸時卽無虛收之事訊之司書等僉稱憚其查察不敢作弊可見同一職守而實心任事與庸碌無能者判然各殊朕簡任大吏均望其認真辦理特伊等孤恩盡職各有不同耳經此次懲辦之後惟願各直省再無此等營私亂法之事除直隸省藩庫收納章程昨已降旨令奏行簡督同藩司嚴格妥議具奏辦理外其餘各直省藩庫均當以直隸此案爲戒務各詳加稽考如有相沿舊習未盡妥善者俱當及早清釐剔除積弊勿致官吏等因緣爲奸自干重戾庶不負朕諄諄教誡至意將此通諭知之○諭軍機大臣等德榜奏新安擊剿叛賊並解鄂縣城圍一

招德楞泰軍營見在豐紳所帶松潘鎮及建昌新疆等處官兵先後趕到統計已有兵四千數百名扎克塔爾揚遇春等亦帶兵五千餘名合計已有萬餘兵力不爲不厚賊匪止有一股不過二千餘人脅從者居十分之六七兇悍者僅六七百人以如許兵力加以東三省勁旅有何難辦務卽乘此兵威勉力辦理一鼓殲除竊聽奏捷佳音切勿稍有延緩至此次楊芳督率新兵奮力擊剿斃賊數十人德楞泰應將新兵加倍獎勵明白曉諭不但潛消其反側更可令其鼓舞效命於勦捕更易蒞事楊芳前因該管營兵滋生事端繼而又不趕緊追賊經德楞泰奏業經降旨革去翎頂此次督兵攻賊受有矛傷尙屬奮勉出力楊芳著加恩先賞還頂帶令其勉力勦賊以觀後效所有此次起事各首逆及有名賊目務須一律擒獲按律嚴辦毋任一名漏網此爲最要○癸亥 上

還京師○乙丑諭軍機大臣等鐵保等奏郭家房壩工進占情形並霜降節前黃水復漲搶護各工緣由一摺郭家房漫工壩基前據鐵保等奏盤築完竣興工進占今復因上游黃水斗漲郭工漫口溜因風激全歸金門下注東壩而豐北睢南邳北各工埽段均有行壑坐墊其銅沛北岸之蘇家山石壩刷塌三十餘丈驟難堵合是該督等於郭工漫口既未能堵閉合龍而見在墊塌工段復層見疊出閘之殊爲焦灼又據另片奏郭工形勢漸變必須添作邊埽疏挑引渠需項較多請於兩淮運庫淮安關庫撥發銀五十萬兩解工應用等語南河工程近年來請撥帑銀不下千萬比較軍營支用尤爲緊迫實不可解况軍務有平定之日河工無甯宴之期水大則恐漫溢水小又虞淤淺用無限之金錢而河工仍未能一日宴然卽以歲修搶修而論支銷之數年增一年偶值風雨

暴漲卽多墊塌此卽工員等虛冒之明驗該督等每奏報一險工必稱他處尙有應辦之工羅列若干是報險者止一處而豫爲將來增工之地者卽不止一處朕固不惜多費帑金設法疏治但盡歸虛擲卽該督等毫無沾染而任聽工員捏報浮開又安用伊等爲乎本年節次請撥之項較之往歲尤多今復請撥銀五十萬兩亦卽照所請於兩淮運庫淮安關庫撥發解工應用該督等摺內旣稱具有天良此語天實鑒之若此中稍有浮冒則是全無人心恐身家性命不能保矣此時正河溜勢弱看來海口改道一事尙無把握該督等當查勘情形如果礙難辦理應如何著手之處卽著據實奏聞不可稍存回護致干咎戾○己巳以成書汪滋琬周興岱俱爲內閣學士

成書由哈密辦事大臣汪滋琬由
廖事周興岱由翰林院侍講選

○壬申侍

郎銜署直隸總督袁行簡卒予祭葬如總督例諡恭勤賞其子元

善舉人一體會試○以秦承恩署直隸總督

由刑部
尚書署

○癸酉諭本

年八月間南據直隸藩司慶格查出司書銀匠串通州縣等將應解藩庫正雜銀兩侵欺舞弊一案特派費瀆長麟前往審辦將作弊官吏大加懲治速行審結而本日又據瑚圖禮奏到藩司章煦查出湖北省武昌等五縣節年解司地丁正耗銀兩銀匠陳信義亦有任意侵欺私將庫收照票洗改之事實可駭異藩司衙門收支出納自應有一定章程鈎稽考覈豈容稍有弊混卽州縣等於應解帑項亦當加意慎重豈容率交書吏人等不加查覈以致有省城銀匠包攬交收通同舞弊情事甚至不肖州縣等亦竟與之勾通分肥今數旬之間連破兩案可見外省積習顛預平日並不認真綜覈書吏等乘機作弊肆意侵欺所在皆有殊難憑信前經特降諭旨通飭各省藩司將章程有未善者妥爲覈辦著再傳諭

各該省藩司等卽將平日收支庫項有無似此弊混之處各行詳細確查早爲釐剔亦不限以時日一經查有弊竇隨時稟明督撫迅卽奏辦不可稍存回護卽查明實在並無弊端亦著遵照前旨將該省收銀章程妥爲籌議以期經久無弊勿致劣員蠹胥等因緣爲奸再釀成此等重案庶不負朕諄諄訓誡至意○增設雲南普洱府屬小江邊等七汛十四塘並撥弁兵防守

冬十月丙子永定河漫工合龍○丁丑諭軍機大臣等德楞泰奏賊匪見大兵雲集四面環攻賊首蒲大芳王文龍等環跪痛哭乞命將首先謀逆之陳達順等三人捆縛送出其逃赴留壩等處賊匪一千餘名又經該逆隨同官兵截回將賊夥四千餘人在彼屯紮懇請分別造冊聽候覈辦看此情形其畏懼乞降自屬可信此時賊營首夥自無樂予駢誅之理惟當將叛賊游匪及乘閒脫逃

之軍流入犯等分別酌覈按律問擬卽至輕者亦當遣戍一面將
各犯照例監禁一面奏聞候旨辦理若實係被裹難民著先行釋
放回籍至方維甸前因勦賊之時無須伊在彼同辦是以諭令回
省見在善後事宜關繫地方者甚多著該撫帶同臬司索納馳往
德楞泰軍營悉心商酌務期妥善其地方事務著仍交朱勳在省
督辦○己卯諭各省巡撫中兼提督銜者有節制各鎮統轄閩省
營員之責前曾准令帶用花翎以資表率見在山東巡撫長齡河
南巡撫馬慧裕俱先經賞戴花翎其江西巡撫張師誠安徽巡撫
初彭齡山西巡撫成甯均准其戴用花翎嗣後此五省巡撫簡任
時卽准其照例戴用如調任他省有旨賞帶方准帶用○壬午命
已革山西巡撫同興赴南河效力○甲申諭甯陝叛賊滋事一案
該叛賊曾經身隸營伍膽敢糾約匪徒肆行不軌攻城毀署戕害

官員以致洋縣城固孝義鄠縣整屋郿縣等各處地方民人均被其擄掠蹂躪情罪重大惡貫滿盈前經特派德楞泰前往統兵剿辦德楞泰自到陝以後並未趕緊進剿藉稱調兵未齊在彼等候該叛賊見無兵攔阻任意奔竄潛出峪口竊伺鎮安見據賊供因同夥內人心不齊未卽東竄此實德楞泰遲延予賊以暇迨經朕屢次降旨飭催始據奏報進兵經楊芳扎克塔爾楊遇春先後截剿卽已大挫兇鋒賊匪蒼黃奔竄始相率乞降昨據奏報到時朕以賊匪既經窮蹙請命人數眾多自斷無梟予肆誅之理然其犯罪甚重豈能不分別懲辦因降旨德楞泰令其於賊營造冊到時除實係裹脅難民先行釋放外其餘從賊之犯仍當按律定擬分別監禁具奏請旨酌量懲辦乃本日忽據德楞泰倭什布奏到除查係被裹難民次第資遣三千八百餘名之外有隨同叛賊之游

匪難民及洋縣監犯各處軍流人等二三百名於未經收集之時先行拋棄軍械陸續逃散見已嚴行查緝至隨同滋事兵丁除被官兵擊傷並逃亡事故外見存二百二十四名擬遴選將弁分投管帶暫歸原營約束操防等語所辦錯謬已極賊匪罪犯不赦卽因其畏罪乞降亦不過貸其一死已屬法外施恩豈有仍令各歸原營充當兵丁之理該叛賊等本由鄉勇充當新兵自作不靖今因其悔罪投誠毫無罪譴不但該賊等罔知儆畏且與各營守分官兵無所區別何以靖人心而肅軍紀從前勦辦三省邪匪彼時賊眾四十萬人無不臨陣痛勦儘以兵威卽間有棄械投出之人經領兵大員等查訊實係被賊逼脅方免一死何嘗稍存姑息邪匪等懾威畏法方能辦理淨盡次第蔽功彼時德楞泰身在行間甯不知之若彼時亦照德楞泰此次辦法一味懦弱壞法養奸又

安能令三省救甯乎德楞泰上次奏到時朕所降諭旨甚明自當
候旨遵辦今將叛賊仍令歸伍其膽大專擅尤出情理之外本當
從重懲治姑念其前在川陝等省帶兵勦賊曾著微勞是以不加
嚴譴德楞泰著退出御前侍衛領侍衛內大臣管理兵部事務管
圍大臣將上次所給議敘撤回仍傳旨嚴行申飭交部議處此不
過稍示薄懲若伊非勦辦邪匪有功之人竟當立予罷斥至倭什
布係本省總督卽伊自爲本管地方起見亦當計及萬全免貽後
患乃並不與德楞泰詳慎熟籌輒行附和入奏實屬糊塗冒昧著
交部議處伊人本無能且年老難勝總督之任著來京聽候部議
所有陝甘總督員缺著全保調補該督接奉此旨不必來京請訓
著卽馳驛前赴新任會同德楞泰方維甸妥辦一切事宜俟半年
後再行奏請入覲其湖廣總督員缺著汪志伊補授汪志伊俟到

京請訓後再赴新任汪志伊未到之前其湖廣總督印務著瑚圖
禮暫行兼署全保到陝尙需時日所有陝甘總督印務卽著方維
甸兼署迅卽馳往軍營接收督篆並先行會同德楞泰將乞降叛
賊二百餘名遵照前旨定擬應得罪名具奏請旨此外在逃監犯
及軍流人等勒緝務獲所有善後各事宜德楞泰等惟當悉心經
理詳細會商務臻妥協以期地方永遠甯謐將此通諭知之○以
曹振鏞爲工部尙書調劉鳳誥爲吏部右侍郎以邵自昌爲兵部
右侍郎

由左副都御史遷

○丁亥以溫承惠署直隸總督起阮元署福建

巡撫○己丑諭兵部會同吏部奏議處德楞泰倭什布均照溺職
例革職請旨一摺所議甚是德楞泰經朕特命爲欽差大臣前赴
陝西勦辦甯陝叛賊一經到陝自當迅速進兵專意勦辦乃遷延
多日總以調兵未齊藉辭等候已屬遲緩迨朕節次嚴催始據奏

報楊芳及扎克塔爾楊遇春接仗兩次後旋卽奏報納降朕因賊
犯人數旣多斷無駢誅之理因降旨令將各犯詳悉查明仍行按
例定擬分別監禁候旨覈辦而德楞泰又不候諭旨到彼遵奉施
行卽擅將賊中投出之民人匪犯三千八百餘名悉予資遣同籍
此內並有各處軍流人犯曾經助賊抗拒官兵者悉置不問甚至
將會充兵丁叛逆滋事之二百二十四名竟交與將弁管帶各回
原營約束操防其糊塗錯謬壞法養奸至於如此實出情理之外
大負朕恩殊不可解此事辦理之初過於張皇繼又失之草率不
顧後患將就完事八月間德楞泰會以賊匪裹脅漸多必須厚集
兵力懇請簡派巴圖魯侍衛及東三省墨爾根學圖官兵前往協
剿朕以其所見適與數日前所降諭旨相符方加優獎是以卽於
木蘭行圍之際先後簡派溫春富翰等率同巴圖魯侍衛章京及

東三省勁旅分起過行星馳協剿乃德楞泰於伊等到陝之後並不令其乘銳圍攻滅此朝食惟以納降爲事任意辦理見已飭該將士等分起回京此無論沿途備辦軍糈虛糜餉項其所費者不貲而如此簡練勁卒遠道馳赴竟不令其痛接一仗往返徒勞成何事體又如賊首蒲大芳卽蒲拜子先經德楞泰上月二十七日奏報稱該逆被官兵圍剿戮傷胸腰數處滾跌落馬幾被擒獲其受傷情形甚爲著重而初四日奏報摺內已稱該逆率領多人在陣投械乞命於其上次受傷之處不置一辭計前後纔止六日若該逆受傷已重此時豈能頓痊若業已痊愈則前次受傷卽屬不重看來德楞泰於此一節亦難免粉飾之辭不足憑信似此辦理舛謬膽大專擅若係他人朕不待交部早已降旨革職並當按律治罪因德楞泰前在川西於賊匪竄過潼河時尙能勇往認真迅

速追勦著有微勞僅退去御前侍衛領侍衛內大臣管理兵部事務管圍大臣仍任爲西安將軍交部議處今該部以德楞泰獲咎甚重雖非奉旨嚴加議處仍照溺職例議以革職請旨甚屬允當本應如所議行姑念德楞泰前此勦辦邪匪有功特加寬貸著加恩改爲革職留任但此事非尋常錯誤可比仍俟八年無過方准開復至伊子蘇沖阿亦因德楞泰勦賊有功推恩晉擢由侍衛挑在乾清門行走洊升上駟院卿內閣學士副都統蘇沖阿數年以來不過循分供職今德楞泰旣以辦理軍務獲咎伊子亦不應過邀恩眷蘇沖阿著革去內閣學士上駟院卿退出乾清門伊父德楞泰先曾管理健銳營卽著伊以副都統管理健銳營事務前往香山直班委什布係該省總督於本管地方軍務尤當詳慎會籌盡心經理前日巡撫方維甸因聞有納降歸伍之說卽能慮及種

種後患專捐密陳請旨酌辦而倭什布則不但見不及此並且附和德楞泰遠遣叛逆等各歸原營竟不慮所管地方將來有無後患本當照部議革職但此事究係德楞泰主見伊係隨同辦理量予輕減著加恩降爲二等侍衛前往科布多辦事仍帶革職留任八年無過方准開復將此旨通諭中外知之○辛卯以恆伯爲內閣學士由科布多參贊大臣遷○壬辰諭軍機大臣等金應琦奏磴口運至

托克托城鹽斤已委員帶同新商前往試辦一節與原議章程不符吉蘭泰鹽斤原議令河東運商一併承運蓋以口鹽獲利較贏庶可以彼之有餘補潞鹽之不足今係另行招商又與潞鹽分爲兩事究竟該省情形如何使商民兩便之處該撫督同藩司悉心妥議具奏尋山西巡撫成甯奏潞鹽口鹽必應分辨甘肅布政使蔡廷衡奏阿拉善王移請坐商辦理不敢分界下部併議尋議吉

蘭泰鹽池在黃河上游比鄰甯夏河東鹽池在黃河下游地接豫
泰相去三千餘里口鹽不能越險行銷河東地方可無須潞商並
辦且潞商已一家承辦數處引地自難兼辦口鹽其河東課引較
多獲利尙厚口鹽納課有限獲利未見有餘亦無庸通融調劑應
如所請分別招商分辦引地至阿拉善鹽池既已呈獻所有衙署
墩汛及牧放牲畜地方應飭委道員勘定四至里數疆界無礙蒙
古游牧並禁止雇用喀爾喀等處駝隻從之○癸巳調薩彬圖爲
倉場侍郎轉桂芳爲禮部左侍郎以普恭爲禮部右侍郎由內閣學士遷
○乙未諭阿林保李長庚奏舟師勦捕得勝擊斃著名賊目等情
一摺據稱蔡逆匪船南竄至竿塘一帶遊奕經阿林保知會李長
庚率師躡追及盜船揮令兵船攻勦擊沈盜船一隻匪犯全行
落海又有蔡逆之姪蔡添來坐船經李長庚督兵圍住攻打擊壞

擒獲匪犯六十七名斬獲首級五顆蔡添來被官兵礮傷胸前穿透落海各等語此次李長庚督領兵船攻剿蔡逆幫匪擊沈盜船一隻並將蔡添來坐船擊壞該匪受傷落海計擒獲及落海者共有百數人看來賊船日少其勢日就窮蹙李長庚督率舟師圍捕不遺餘力奮勇可嘉俟拏獲蔡牽再賞世職酬勳至蔡添來一犯係蔡逆胞姪助逆肆惡本爲緊要賊目今經官兵擊斃其羽翼蔡逆自必聞而喪膽阿林保正當乘此機會催令李長庚上緊圍捕速擒巨憝以靖海疆○丁酉諭軍機大臣等鐵保等覆奏海口改道事宜一摺據稱見在減壩六十里碩項湖蒙沂各水匯注之處尙屬河湖一片溜非一處涸離甚少駁難施工等語目下當冬令水涸之時而減壩下游河湖尙成一片豈能於水內施工看此情形改道之說甚難行不必再爲觀望惟新河旣不能辦勢不能

不仍用故道而雲梯關一帶近益淤阻必富及早疏濬深通將來
汎水長發時方免泛濫之慮此時應如何酌堵減壩挑挖舊河卽
當趕緊豫籌不可再緩並著將需費錢糧若干比較辦理新河多
寡難易之處迅速奏聞至另片稱目下辦工緊要懇請簡派熟習
河務大臣一員來工商辦之處此則近於推諉殊非任事之道見
在廷臣內諳習河務者本少鐵保係該省總督在彼經理河務有
年戴均元本係特派前往因其留心工程徐端更爲諳悉伊三人
惟當一力肩承責無旁貸又何必另請大員前往督辦至將來工
竣時朕當特派親信大臣查驗設工程不能如式及屬員中有冒
銷錢糧諸弊伊等不能舉發一經查出則惟伊三人是問○大學
士保甯以疾辭職允之仍令食公爵全俸○己亥以哈甯阿爲內
閣學士

由太常寺卿遷

○癸卯阮元以病解任調張師誠爲福建巡撫以

金光梯爲江西巡撫轉周廷棟爲刑部左侍郎以韓封爲刑部右侍郎史積容爲湖南布政使巴哈布爲湖南按察使

由岳常
禮道遷

十一月乙巳諭兵部奏遵旨議處扎克塔爾請照有意隱諱革職

例革職一摺扎克塔爾派往陝省軍營隨同德楞泰剿辦甯陝叛賊經德楞泰派在前敵當賊匪由斜峪關南竄之時扎克塔爾同楊遇春帶領河州固原等處官兵前往追剿趕上賊匪當經痛加剿殺殲獲多名追追至方柴關地方遇見成隊賊匪彼時天色已晚官兵轉戰竟日未免力疲而賊匪恃險屯聚人數眾多官兵被賊衝壓數次致有散失扎克塔爾同楊遇春帶領親隨數十人至該處把總營汛圍牆內駐守賊匪正在四面圍繞之際而溫春等帶領東三省馬隊適至賊匪一見馬隊南北兩山頭屯聚之賊立時畏懼奔回賊首蒲大芳王文龍等遂親率賊眾趕至扎克塔爾

楊遇春馬前棄械投誠扎克塔爾等諭以如果實在投誠可將首逆縛獻撤退賊眾再行定議彼時蒲大芳等立將首逆陳達順陳先倫向貴三人縛獻扎克塔爾等一面令賊停紮一面稟知德楞泰定奪德楞泰接據稟報率准受降又不候諭旨遽將叛逆二百二十四名交與將士管帶各回原營並將賊營內三千餘人不問其是否係地方遊匪及監犯軍流人等竟與被裹之人一律遣散種種紕繆不可枚舉全係德楞泰之罪至扎克塔爾與楊遇春均止偏裨不能專主其事若朕因受降治諸將領之罪則楊遇春卽與扎克塔爾同在一路帶兵楊遇春旣未加罪自亦不以此罪扎克塔爾伊若於朕面詢軍務時詳細確陳原可不必交議乃扎克塔爾於到京之時經朕面加詢問止稱賊匪畏罪請降其於追賊至方柴關兵散被圍各情並未言及不以實奏是其罪案朕復令

軍機大臣詢問所言亦同迨上月二十七日德楞泰奏到詳細情形朕復令軍機大臣傳到扎克塔爾詢問未將德楞泰原摺給看扎克塔爾慮及德楞泰據實奏明始行陳出實情是扎克塔爾前奏殊屬不實不盡其隱飾之咎實無可辭是以將伊退出御前侍衛降爲乾清門侍衛撤銷前次議敘交部嚴加議處連日部議未上之先朕詢問自軍營回京之富翰溫春桑吉斯塔爾等其所言扎克塔爾在方柴關追賊被圍情節悉屬相符今兵部議以革職固屬咎所應得但朕於諸臣功罪或輕或重務期權衡至當不肯稍有偏畸扎克塔爾之罪在於隱飾而較之慶成則有不同慶成本年陞見來京朕於召對時因其曾經剿賊立功受傷屢沐恩施當詢以曾否得過雙眼花翎慶成輒信口謊稱在副將任內曾經得雙眼花翎迨詳查檔案並無其事伊竟以一片虛誑之詞面肆

欺罔欲圖蒙混邀恩殊無忌憚是以將伊革職發往黑龍江效力贖罪扎克塔爾於垂詢軍務時尙不敢信口捏飾冒功惟於方柴關追賊受降時是日各種情節不行詳細備陳意存隱匿諱敗爲勝仍染軍營惡習不以誠實對君上其獲咎實在於此慶成扎克塔爾同係御前侍衛俱經殺賊立功並曾打仗受傷惟伊二人情節既有不同則獲譴亦當有別且慶成係漢軍世家尤當通曉大義而扎克塔爾則係川省番目出身情稍可原且平素當差尙屬勤慎自應量加寬貸惟扎克塔爾既係番族在京管理旗務究非所宜此時若仍令在內當差任護軍統領蒙古副都統伊亦不能將該管旗人認真約束殊覺有名無實扎克塔爾著退去乾清門侍衛鑲白旗護軍統領正紅旗蒙古副都統加恩留伊所得三等男及恩騎尉世職並仍賞戴花翎著卽回伊本省四川地方交與

總督勒保以副將差委補用觀其後效並著將懲治扎克塔爾及慶成兩人分別覈辦緣由通諭中外知之○戊申諭軍機大臣等德楞泰方維甸奏稱降賊尙在疑慮懇懇緩以時日相機辦理等語太不成話叛匪既懷疑慮此時若不辦理則受降已久卽應將留存各兵全撤歸伍將軍巡撫亦應回省莅任何能遲之又久忽復將此二百二十餘人問擬罪名若仍留兵防守尤難保不別生事端德楞泰全保方維甸仍遵前旨將蒲大芳王文龍及其餘叛匪調集到營明白宣諭以爾等曾隸營伍膽敢攻城戕官罪大惡極今因爾等悔罪乞降蒙皇上法外施仁貸爾一死但發遣之罪斷難倖免該匪等聞知果能束身聽命此則事機之最順者設或抗傳不到卽屬已降復叛罪無可辭卽當置之於法或有抗拒情事朕亦不責以激變之罪若止顧一時養成後患不特德楞泰獲

戾滋重卽全保方維甸亦不能辭咎矣○以常明爲陝西布政使張映漢爲山西按察使

由湖北
進道選

○己酉諭據禮部奏本月十三日

恭值 聖祖仁皇帝忌辰是日 園丘大祀禮成後仍穿常服不

挂朝珠等語所議尙屬未協 郊壇大祀卽恭逢 祖 宗 列

后忌辰俱當備用吉禮不特祭祀之日應御禮服卽前三日齋戒

期內服色亦應照常蓋禮統於尊誠爲不易定制至於禮成之後

則威儀已備是以車駕還宮樂卽設而不作若是日在宮內視事

仍穿用常服於心實有不安嗣後 郊壇大祀之日適逢忌辰禮

畢還宮後卽遵照忌辰儀注吏用素服庶敬 天尊 祖禮協義

宜○辛亥諭向例上書房師傅春分以後於申正退直秋分以後

於申初退直本有一定時刻所以專課程也近來上書房師傅竟

不按向來例定時刻退直甚早意涉疏懈且從前師傅等於散直

時必將係某時刻散去告知管門太監登記以備稽覈而見在師
傳等並不照舊日章程告知太監太監等亦置不問均屬不合所
有上書房師傅萬承風桂芳戴殿泗俱著罰俸半年此因積久因
循初次查出姑示薄懲嗣後上書房師傅著遵照向例春分後於
申正散直秋分後於申初散直並將散直時刻告知管門太監按
日登記其管理部院在上書房行走大臣如遇有部院應辦事務
及奉旨特派事件應早散直者亦著將因何早散緣由告知管門
太監隨時登記以備查覈儻經此次申諭之後仍有任意疏懈情
事一經查出必行嚴懲不貸○癸丑諭方維甸奏德楞泰接奉嚴
諭十分悔懼近復痰多氣喘且覺語言精神闕照不能周到看來
德楞泰業經許令該匪等撤回原伍此時欲分別遣戍自多窒礙
著勒保接奉此旨後卽帶留駐省城之屯土各兵速赴軍營與全

保方維甸當面籌商務臻妥善其四川總督令特清額署理如該
匪等竟有蠢動情事該督卽統兵勦洗○丁巳諭軍機大臣等王
甯奏驅逐廓爾喀竄出逃人並廓爾喀國王呈進表貢一摺覽奏
俱悉噶箕乃爾興在該國謀逆被誅伊弟熱納畢各喇卽係逆黨
畏罪潛逃斷無放進唐古特界內任令容留之理王甯派委把總
出口面諭嚴加駁斥所辦甚是至該國王投誠向化已閱多年今
不幸慘遭內變嗣王年尙幼穉卽能誅殛罪人申明大義實堪嘉
憫今敕關進表納貢備陳喇特納巴都爾被殺及噶箕乃爾興等
就戮緣由情詞恭順恪守藩封自應渥承恩眷俟另頒敕書賞件
交王甯等祇領頒給可也○戊午諭前經屢降諭旨令各衙門遇
有應奏事件卽隨時陳奏無許需緩積壓乃本日奏事者又復奏
寥惟理藩院具奏謝恩內務府奏回子學生二事此外各該衙門

竟無一陳奏事件因檢查憲書今日適係破日諸臣等自緣意存
拘忌將應奏事件暫緩呈遞亦屬非是朝廷政事繁多惟日孜孜
猶恐不及若稍涉延緩勢必展轉沈閣豈不漸滋贋胥之弊向來
惟萬壽慶節元旦除夕及齋戒期內刑部例不奏事此外並無停
止章奏日期若拘於日者家言則緡閣懸轡動多禁忌如本月二
十七二十八兩日皆係破日又豈皆不奏事所謂一日二日萬幾
無曠庶官者顧如是乎著再傳諭部院等衙門嗣後於一切應奏
事件隨時呈遞勿再存此等拘忌俗見以副朕勤政救幾至意○
己未命祿康爲東閣大學士以刑部尙書長麟協辦大學士調德
瑛爲戶部尙書以瑚圖禮爲吏部尙書韋煦爲湖北巡撫調阿禮
布爲湖北布政使以蔣攸銛爲雲南布政使陳預爲江西按察使
○山東兗沂曹道遷○以文甯爲步軍統領成書爲工部右侍郎○癸亥諭

近日朕屢降諭旨訓飭各部院衙門辦事遲緩以防怠玩積壓之弊本日御史英綸因有請定進署畫彙章程之奏所言亦是但此事惟在各部院大臣恪遵諭旨實力奉公若如摺內所稱將各大臣進署散署俱定立一准時刻殊覺於事無益各衙門事務繁簡不同卽彙件之多寡不一該大臣等果能每日早進公署將應辦事件一一清楚完結卽爲無曠厥官若定以時刻在不實心任事之人終日在署端坐而於事理槩不置可否其事務較簡衙門公事早畢二三僚友靜坐燕談又於政治奚裨乎至謂各衙門送畫彙件經旬累月不能畫回此則實無其事部院事件本有定期其書畫題奏咨行亦俱有月日可憑朕勤求治理時加考察該大臣等亦何敢將彙件存留私宅任意耽延設有一二怠惰之人御史密指名參奏不得籠統聲敘總之國家庶事繁多各部院堂官身

屬秋釐正庶僚惟當勤以蒞事公以率屬自能贊襄國是百度修明原不在更定科條務名鮮實所謂治事不如治官身爲大臣者仰體朕日理萬幾孜孜求治之意無致言事者有曠官之誚實所厚望焉○壬申增八旗及內務府三旗圖明圍包衣三旗養育兵四千四百名○發倭什布烏嚕木齊效力

十二月丁丑命理藩院通行內外眾扎薩克蒙古王公等嗣後年班圖班請安時俱著正穿石青馬褂不得穿黃馬褂及反穿馬褂著爲例○戊寅太子太保大學士朱珪卒晉贈太傅入祀賢良祠遣庶郡王永璘帶領侍衛十員往奠茶酒賞銀二千五百兩治喪予祭葬○己卯 上臨故大學士朱珪第賜奠○諭昨因大學士朱珪逝世業經降旨加恩因思乾隆年間惟故大學士劉統勳蒙皇考高宗純皇帝鑒其品節 賜諡文正易名之典備極優隆

顧劉統勳於署總督任內曾經獲咎褫職復蒙

皇考施恩錄用

至朱珪立朝五十餘年外而數歷總督內而存直綸扉身躋崇要
從未稍蹈愆尤絕無瑕玷靖恭正直歷久不渝猶憶伊官翰林院
皇考特簡爲朕師傅爾時朕於經書已皆竟業而史鑑事蹟均
資講貫其所陳說無非唐虞三代之言不特非法弗道卽稍涉時
趨之論亦從不出諸口啓沃良多揆諸謚法實足以當正字而無
愧無庸俟內閣擬請著卽賜謚文正本日朕親臨奠醊見其家門
庭卑隘清寒之況不異儒素瞻念遺風愴懷未已著於本月初九
日由內務府備辦飯桌派二阿哥前往代朕賜奠俟殯送時派慶
郡王永璘前往祖奠目送以示朕眷懷舊學哀榮備至之意○庚
辰諭朕惟厚生之道在乎節儉國家重熙累洽生齒日繁日用所
需人人取給而天之所生地之所長止有此數卽使雨暘時若歲

獲屢豐小民蓋藏猶虞不足又况水旱不時豈能盡獲豐稔設遇歉歲支絀倍形若再性好奢華不思撙節勢必立見匱乏何以保生聚而慶盈甯卽如本日戶部奏嘉慶十年分民數穀數朕詳加披覽民數比上年多至二千七百七十二萬一百一十九名口而各省存倉穀數則比上年少二十九萬四千二百四十八石有零自緣各該省間遇偏災倉儲卽有短絀閭閻生計安可不裕之於平日乎近來八旗戶口亦歲有增添而所得錢糧限於定數伊等富差執業亦須衣食稍充方能安心習學若平時不知節省焉能自贍身家乃邇年風氣日就華靡飲食衣服無一不競美爭鮮毫無節制以致數日之用罄於一日數人之養竭於一人甚或飲酒看戲遊蕩賭博錢糧入手任意花銷不顧身家罔慮後日豈非自取困窮乎朕崇儉黜奢務敦淳朴向來東三省隨圍官兵於引見

較射時所服均係布素深得持儉之道甚爲嘉悅見在年終卽須引見世職官員及凡一切引見伊等卽服著布素有何不可又何須過飾衣帽爭尙華綺耶此後旗人等尤當自知謹身節用崇尙儉樸以期仰事俯育共慶生成無負朕諄諄訓誨至意將此通諭知之○壬午諭軍機大臣等鐵保等奏報郭家房大工合龍穩固情形一摺郭家房大工自八月下旬開工以來該河督等籌催料物疏挑引河趨築壩座步步進占茲得合龍穩固實爲幸慰至漫口旣經堵合黃水全注下游必須將減壩堵閉合龍方能挽歸舊河不至復行散漫所有減壩工程著於明年正月底凌汛以前堵築完固方爲妥協○乙酉以恆伯爲西甯辦事大臣凱音布爲內閣學士

由詹事遷

○以潤祥爲左副都御史

由大理寺卿遷

○辛卯戶部議准

山西巡撫成甯奏河東鹽務章程一陝西鳳翔府八屬向食花馬

池鹽今應改銷潞鹽邠州並所屬二縣向行潞鹽但其地距花馬池較近應令食花馬池鹽一請於巡按河東鹽政監察御史印內添鑄吉蘭泰三字並鑄頒河東道兼管山西陝西河南鹽務關防陝西鳳邠道甘肅甯夏道兼管鹽務關防一改甯武府同知爲河東監掣同知仍駐運城一陝西花馬池鹽課大使舊改爲分防縣丞今應復設大使原設鹽知事並歸經歷管理一監掣同知磴口運判河口批驗所大使定爲繁難要缺東場大使改爲繁缺西場中場及新設磴口吉蘭泰大使均定爲簡缺從之○癸巳諭單機大臣等楊芳係營伍字識出身洊膺恩擢乃身爲專閫大臣平日取兵不能嚴明訓練一味姑息以博寬厚之名致令兵丁不知軍紀桀驁者糾眾倡亂怯懦者臨陣潰逃其咎實難寬宥德楞泰等議將楊芳革職遣戍自應如此辦理楊芳著革職發往伊犁交與

松筠派令效力贖罪至楊遇春戰功較著且管兵有方眾心知感
伊擢任固原提督後並未到任此次甯陝叛案及固原等營官兵
潰散皆非伊任內之事自應量予從寬前已降旨將楊遇春降補
甯陝鎮總兵嗣後惟當責令妥爲管轄務使營伍日就整肅勿再
懈弛干咎○己亥改福建糧儲道爲分巡甯福海防兵備道移駐
福甯○改定陝西陝安甯陝各鎮營制○是歲朝鮮琉球來貢○
會計天下民穀數直隸等省通共大小男婦三萬三千五百三十
萬九千四百六十九名口各省通共存倉米穀二千八百十一萬
三千三十石七斗三升三合五勺

東華續錄

臣王先謙

臣周瀚蕃恭校

嘉慶十二年丁卯春正月丙午命費淳爲體仁閣大學士以戶部尙書戴衢亨協辦大學士調鄒炳泰爲吏部尙書以劉權之爲兵部尙書周廷棟爲左都御史轉韓對爲刑部左侍郎以秦瀛爲刑部右侍郎

由順天府府尹遷

○乙卯四川總督勒保奏綏定府新兵滋事

官兵進剿生擒首惡王得先孔傳世劉金定殲除夥黨得旨嘉獎

○壬戌移建陝西甯陝廳城○丙寅賞那彥成三等侍衛爲伊犁

領隊大臣○戊辰西安將軍德楞泰奏陝西西鄉營瓦石坪汛新

兵滋事督兵截剿殲擒首逆周士貴等並夥黨多名得旨嘉獎

二月甲戌上御經筵○移建福建鳳山縣城○丁丑諭軍機大

臣等阿林保奏蔡逆匪船因沿海斷絕接濟奔竄入粵見催舟師
過境會剿一摺蔡逆匪船因閩省舟師追剿緊急水米火藥一無
接濟乘間竄往粵省希圖遠颺延喘其勢窮蹙已極但聞粵洋匪
同一劫盜安知不聲息暗通同惡相濟見在粵洋盜首如鄭一烏
石二等著名巨慝尙在稽誅設蔡逆匪船入粵後該逆等容留合
夥豈不又增其羽翼此時阿林保已咨令李長庚趕過粵洋蹂躪
追剿第念粵省海洋沙綫李長庚未能諳習且恐閩省所造同安
梭船帶入粵洋駕駛不能應手於事轉屬無益吳熊光或於粵省
多備米艇俟李長庚帶兵到粵時令其酌量換駕俾資緝捕尤爲
得力總之蔡逆旣入粵洋則粵省舟師卽應上緊迎剿此事責成
吳熊光督飭錢夢虎孫全謀統領舟師探蹤迎擊與李長庚收兩
面夾攻之效斷不可令其與粵省盜匪合夥此爲最要○戊寅禁

新疆官吏越級僭用頂帶○己卯 婉貴太妃薨 上至吉安所

奠酒○庚辰諭本年京察屆期吏部開列在京各部院大臣及各
省督撫名單進呈請旨甄別大學士向不開列第念大學士慶桂
董誥參贊綸扉襄理樞務恪勤供職夙夜匪懈廉費追雖甫經
補授大學士但平日辦理部務均屬勤慎俱著加恩交部議敘協
辦大學士刑部尚書長麟辦理刑名綜覈詳慎協辦大學士戶部
尚書戴衢亨經理度支兼軍機處行走勤慎出力兵部尚書明亮
係舊有勞績之人近年辦理部務亦均小心無誤戶部侍郎托津
在軍機處行走供職勤慎均著加恩交部議敘都察院副都御史
誠存自捐置憲臺毫無建白且年已衰老著卽以原品休致餘均
著照舊供職四川總督勒保在外更事有年勤能諳練閩浙總督
阿林保雖補放總督未久但到閩後於海洋捕務能認真督辦使

洋匪接濟斷絕勢極窮蹙洵屬勤勉均著加恩交部議敘餘俱著照舊供職○壬午諭初彭齡奏壽州三命重案審有請託情弊據實參奏一摺壽州武舉張大勳家毒斃三命一案先於嘉慶九年經總督陳大文委淮徐道鰲圖等馳往查辦卽訊出因姦謀毒情形當交與安省臬司鄂雲布楊護研究彼時各犯証到案之後悉如前供並無異詞迨後因訟師劉儒恆具呈控告復有旨特交鐵保審辦鐵保委江甯藩司康基田等覆審數次亦如安省所審並未改供因康基田有河工要務經鐵保調往清江改委新任臬司遇昌率同蘇州府周鈞等審辦此案一到蘇州經周鈞等訊問遂卽全行翻供捏爲蛇毒烘板情節支離謬妄全案子虛見經初彭齡審明此案實係張大勳胞兄張大有因姦起意謀毒致斃證據確鑿本日復據奏到提訊蘇州原驗仵作王鳳等四人均稱原驗

實係中毒其中卷內供辨別中毒服毒一段伊等並無此語亦未
畫供係屬周鏐向其教供隨又根究出案內有名之貢生孫克偉
其胞兄孫克俊素與周鏐在京相好又孫克偉亦與長洲縣知縣
趙堂認識上年到蘇託情等語周鏐等以承審委員審辦此等重
大命案輒敢聽受請託顛倒獄情甚至向作教供希圖翻案實
出情理之外殊爲可恨必有受賄情弊自應徹底根究以儆官邪
此案初彭齡奏到定擬之後又據都察院奏有胡兆信來京翻控
是以續派侍郎王麟韓封前往覆訊並有旨將案犯張大有暫緩
處決以憑質訊該侍郎等在途接奉此旨著迅速行走並該部行
文沿途將胡兆信趕緊解往備質王麟等於到彼覆訊之後如別
無疑實卽著一面奏聞一面將張大有正法其知府周鏐知縣趙
堂萬承紀均先著革職鎖拏並交王麟韓封會同初彭齡嚴加審

訊究竟有無得贓入己情節卽加之刑訊亦無足惜其候選道員孫克俊並著革職交順天府五城查拏解往歸案刑訊所有此次來京翻告之胡兆信並著玉麟等究明係何人教唆來京是否亦係周鏐等所爲卽確實訊明一併具奏至此案固係周鏐等顛倒案情蒙混上司何以臬司遇昌肯卽照依詳轉毫無指駁恐遇昌亦不免有受託等情並著玉麟等詳細研究不可稍有瞻徇如遇昌委被蒙混亦當將周鏐等如何蒙混該司之處訊問明確將該司嚴參議處如訊有受託情事卽著將遇昌傳旨解任再行嚴鞠鐵保於遇昌詳到後率卽照擬完結並將周鏐等保奏亦屬謬誤並著定案時一併參奏初彭齡於此案悉心推鞠秉公查辦俾冤獄平反得成信獻實屬可嘉不負委任著加恩交部議敘○甲申諭直省督撫清查積案○丙戌諭朕恭閱 皇考高宗純皇帝聖

訓內載 上諭內務府嗣後挑選秀女遇有 皇太后 皇后親
弟兄之女親姊妹之女記名者著戶部奏聞撤去記名至妃嬪等
姊妹親弟兄之女親姊妹之女有記名者著內務府告知首領太
監奏聞等因欽此仰見我 皇考訓諭詳明至爲周備前於嘉慶
五年間曾經降旨令自嬪以上親姊妹俱加恩不必備挑其親弟
兄親姊妹之女則不在此例辦理尙未盡一自應恭繹 聖訓酌
定章程嗣後 皇后妃嬪之姊妹及親弟兄親姊妹之女於挑選
秀女時仍一併備挑著戶部內務府聲明另爲一班不必拘定年
歲作爲各本旗頭起帶領著爲令○申禁廷臣與諸王交接○丁
亥諭京察爲考績大典所以甄別賢否明示激勵向來內外大員
由吏部開列具奏朕覈其勤能者均特旨賞給議敘其餘或照舊
供職或量予罷斥其司官等經各該衙門甄別等第後內保薦一

等者亦皆引見各予加級惟三四品以下京堂向由王大臣驗看
擬列一等者例無加級近年槩行帶領引見除年有才具平庸者
量予降黜外餘俱照舊供職並無甄敘之例因思三品以下京堂
官其才具優劣不同且三年內勤惰各異若有懲無勸既與內外
大臣辦理兩歧並不得與各部院司官保列一等同邀加級未免
偏枯所有此次京察引見三品以下京堂各官太常寺少卿色克
精額差使勤奮讀祝嫺熟太常寺少卿錢楷內閣侍讀學士文孚
在軍機處行走有年供職勤慎著加恩交部議敘其太常寺卿陳
鍾琛大理寺少卿楊長桂內閣侍讀學士通恩通政使司參議聞
嘉言或人本平庸或年已衰邁著以原品休致餘俱著照舊供職
嗣後京察三四品京堂引見均卽照此辦理並將此旨載入吏部
則例○辛卯免陝西西安等管歷年借款官弁十分之二兵丁十

分之三○改陝西西安營游擊爲漁渡營游擊兼轄瓦石坪汎漁渡營都司爲西鄉營都司撥西鄉營把總一員兵一百名隸漁渡營○壬辰 上啓鑾謁 東陵 西陵○免經過地方額賦十分之三○乙未 上謁 昭西陵 孝陵 孝東陵 景陵 裕陵

○戊戌免直隸天津乾隆五十三年以前缺徵海稅盈餘銀

三月甲辰 上幸南苑行圍○乙巳諭朕展謁 西陵道經畿甸

原任大學士朱珪墓近距蹕路數里追維哲輔逝已三月瞻眺松阡中心愴惻著派侍郎英和於本月初五日前往賜奠以達朕懷○戊申江南王營減壩大工合龍賞戴均元徐端太子少保○辛亥 上謁 秦陵 秦東陵至 孝淑皇后陵奠酒回鑾○甲寅

上還京師○乙卯諭玉麟初彭齡奏訊明壽州謀毒三命正犯卽行辦理並訊問江蘇委員等大槩情形一摺此案玉麟於到安

徵後提集犯證遂加審訊委係張大有因與弟婦通姦謀毒三命與初彭齡原審悉符其胡兆信張保國前後翻供之處業據訊屬虛誣是案情已無疑義張大有一犯業經王麟等遵旨正法其餘定擬各罪名著刑部覈議具奏○以長琇爲左副都御史

由通政使遷

○丁巳 高宗純皇帝實錄 聖訓告成○戊午以楊志信爲山

東布政使調方受疇爲直隸按察使朱棟爲河南按察使以查渚

爲貴州按察使

由湖南擢道遷

○辛酉 上諭 黑龍潭祈雨○甲子雨

○丁卯定內務府京察一等人員覆行引見例○辛未命嗣後拜

唐阿有係貢監生員者准其應試○壬申以百齡爲湖南按察使

由福建汀漳龍道遷

夏四月甲戌 皇后行躬桑禮○以甘肅大通縣番眾肆劫命提

督百祥剿之○丙子諭朕閱會典所載 大雩典禮惟乾隆二十

四年曾經舉行一次其時 皇考高宗純皇帝減膳虔齋不設園
簿不陳樂不乘輦乘騎出宮詣 壇齋宿次日御雨冠素服步謁
於 壇仰見 皇考敬 天勤民精虔昭格體成後卽甘霖普降
四野霑足感召之理如響斯應至雨水調勻之歲每遇 常雩大
祀則前期齋宿 郊壇係由宮中乘輦而出儀物具備此次恭值
常雩朕進宮齋戒因思上年冬間雪澤較少本年春雨又稀前
已設壇祈禱得雨兩次仍未霑渥且近畿以及東豫等省均尙在
望澤雖未至旱暵太甚究與往歲情形不同今當 大祀屆期若
仍照常御輦詣 壇朕心實有不安本月初六日朕由宮中御體
輦前詣 天壇齋宿著該衙門敬謹豫備其一切服飾儀仗均如
常儀朕宵旰民依罔敢暇逸或此一念減抑之誠得以上邀 昊
鑒甘膏速霑福我三農實所籲望而冀幸者嗣後遇雨澤稀少之

年舉行 常雩祀典均著照此行○以王家賓爲廣西按察使

由桂

平格 卷

○壬午諭玉麟等奏訊明江蘇州縣承審壽州三命重案

徇情故出情節按律定擬並將該總督臬司分別參奏一摺已交刑部議奏矣臬司迨昌於此等重大之案並不豫提犯證親行確訊及府縣具詳後又不細覈案情悉心推鞠該司爲刑名總匯一任屬員受屬蒙詳顛倒獄情竟同聾聵僅予革職不足蔽辜遇昌著革職發往烏魯木齊效力贖罪至總督鐵保於特旨交審之案卽與欽差無異乃並不親提嚴訊率據承審屬員照擬定案復失察周錫等徇情蒙混之弊轉以平反得實代請議敘實屬錯謬鐵保著革退宮保銜拔去花翎仍交部嚴加議處俟奏上再降諭旨尋議革職得旨降爲二品頂帶仍帶革職留任○癸未以貢楚克扎布爲察哈爾都統轉瑚素通阿爲刑部左侍郎以廣興爲刑部

右侍郎

由總管內務府大臣選

○調百齡爲江蘇按察使以曾煥爲湖南按

察使

由兩淮鹽運使選

○丙戌

上閱健銳營兵○壬辰命五城設廠平

驛

○甲午命刑部清釐庶獄○乙未以陳崇本署左副都御史

由

人府府丞

○己亥諭向來祈雨報雨本無樂章迨乾隆十八年始行

增設至祈晴報晴本不時有嘉慶六年曾因雨水稍多舉行此禮

彼時未經議設樂章因念雨暘祈報民瘼攸關典禮自宜畫一所

有新晴報晴應行增設樂章之處著樂部太常寺查明交翰林院

妥擬進呈候朕閱定交太常寺載入則例永遠遵行○諭光祿寺

卿錢楷奏京師春夏以來雨澤稍稀請循照漢書求雨閉陽縱陰

之說將見在正陽門外修築之石道暫停工作以期甘霖速沛一

摺五行生剋制勝雖見諸傳記大率經生強爲傅會其事多迂窒

不可行卽如漢書求雨註內所稱閉南門禁舉火之類此或在一

鄉一邑尙可遵循偶一爲之至京師都會之地車馬輻輳行旅絡繹又豈能拘泥陳言槩行禁止設令正陽崇文宣武三門暫閉數日尙復成何政體從前寶光霽感於此說竟有不開房門從窗牖行走之事豈非大笑談乎朕見因京城雨澤愆期昕夕齋心默禱惟期勤修實政敬迓天和若謂將見在所修之石道暫停工作數日遂可以立沛甘霖恐感應之理未必在此所奏應無庸議至伊前日召見時面奏太常寺則例所載祈報晴雨儀注不同因當時記憶不真奏對舛錯自請交部議處一節已另降諭旨交太常寺等衙門查明補纂樂章以昭畫一錢楷簡任太常寺未久旋即升任於該衙門事例記憶自未真確所有伊自請處分著加恩寬免○申禁地方官擅造非刑○戊戌 上詣 黑龍潭祈雨五月丙午諭端陽節日不過與中秋瓜餅節相等非元旦之必應

慶賀者可比蓋元旦義重履端設其時偶值雪澤未敷正殷祈盼
自未便因此遽省朝正之典所以重歲首普春祺也至重午日卽
在尋常雨暘時若之年向例亦止圓明園奏事推班一日王大臣
等全遞膳牌共申慶節之意今歲畿輔一帶入春以來總未得有
透雨節經設壇祈禱並平糶省刑以期速迓和甘連日霽陰密布
閒有微雨飄灑旋即晴霽尙未渥沛醲膏朕宵旰焦勞無時或釋
曾經通諭王大臣等如端節前已沛甘霖卽循照向例推班慶節
如尙在望澤則照常辦事其並非輪值奏事之部旗俱不必來園
乃今日王大臣等仍相率呈遞膳牌殊屬無謂伊等旣非奏事及
帶領引見又非直日若因慶節而來則今歲端陽有何可慶賀而
爲此虛文乎且伊等輿從絡繹紛至沓來在里巷小民未必不以
爲見當祈雨之時慶節猶如往歲不幾視朕爲置民瘼於不問耶

王大臣等何不仰體朕意一至於此除在內廷行走及承值奏事帶領引見之王大臣等無庸議外所有本日不遵朕旨來園之禮親王昭槤鄭親王烏爾恭阿肅親王永錫順承郡王倫柱裕郡王亮煥克勤郡王尙格貝勒永珠永瑩縣勲貝子縣懿縣洞奕紹奕綸協辦大學士尙書長麟尙書恭阿拉王懿修奏承恩博興都統慶怡巴特瑪侍郎秦瀛周兆基薩彬圖李鈞簡副都統永玉積拉堪裕興哈甯阿明泰王集蘇冲阿花沙布順天府府尹宋鎔俱著各罰職任俸三箇月雖有紀錄不准抵銷○丁未定各直省奏咨案件違限處分○初彭齡丁母憂以董教增爲安徽巡撫姚令儀爲四川布政使方積爲四川按察使

由鹽茶道遷

○戊申諭朕恭讀

太宗文皇帝實錄崇德四年八月內欽奉 聖諭從來君明則臣勞而民安君庸則臣逸而民危朕豈不恤臣工勞苦但當此天心

眷佑之時正我君臣勵精圖治之日爾諸王貝勒貝子大臣等若不各加勤勉朕以一身宵衣旰食亦復何爲欽此 聖訓煌煌昭垂奕禩敬思我國家景運初隆 肇基東土彼時版圖未廓地方民人政務尙簡而我 太宗文皇帝敕幾勤政惟日孜孜諄勉在廷儆其怠逸用能贊襄郅治光啓鴻圖 勦業之隆遂爲前古所未有今則車書一統四海之大兆民之衆一日萬幾更當如何兢業設稍萌玩愒何以慎守丕基我 皇考高宗純皇帝御宇六十年宵旰勤勞耄期罔倦直至嘉慶元年以後猶復昕夕 訓政弗懈益虔內外臣工共聞共見朕寅承大寶祇奉 訓言夕惕朝乾所其無逸實不敢一念稍弛誠以守成之難非克勤無由制治但諸臣等分任效能亦當共勤職業豈容怠惰偷安朕頻年節經降旨訓誨並曾親製勤政殿記勤政箴頒示中外提撕儆覺不啻至

再至三諸臣中自不乏恪恭匪懈之人而狃於積習因循怠忽者
正復不少此在年力壯盛之員固當任事出力卽年齒較增亦當
振其積惰朕觀諸臣中有已逾耆齡而夙夜在公並不稍形竭蹶
其心存懈弛者精力轉日見衰憊可見莊敬日強實有至理國家
詔精受祿各有職司一日在乎其位卽當一日業乎其官一日不
得乎其官卽一日不敢立乎其位此實古今通義如果自揣精神
不能振奮筋力實已衰憊於應管諸務不能經理原可據實陳情
懇請退休朝廷自有恤老之典任其優游自適若既懷戀職又復
遇事摸稜惟就安逸是直自便私圖罔顧公義國家又安賴此充
位之大臣乎嗣後內外大小臣工惟當仰體朕心隨時循省以怠
荒爲戒有則改之無則加勉庶幾殫精竭慮各揚其職用副朕積
承 鴻緒整飭百度之至意○己酉雨○丙辰增福建臺灣府鄉

試中額一名四縣學額各一名○已未命八旗仍設官圖養馬○

改設安徽潁州營參將並移駐增設弁兵○全保以病免以長齡

爲陝甘總督吉綸爲山東巡撫薩彬圖爲漕運總督

由倉場侍郎遷

○庚

申申禁地方官諱盜及胥役勒索○甲子諭吳熊光奏馳赴東路

督催舟師接捕蔡逆緣由一摺據稱屢奉訓諭飭令專注蔡逆一

股併力殄除餘匪且從緩辦而提臣錢夢虎等因途遇鄭一匪船

就便截擊未免不知緩急其蔡逆下落亦未踴探確實等語蔡牽

一犯本係閩洋盜首因閩省舟師追捕緊急水米火藥亦無接濟

所贖盜船無多乘閒竄入粵省爲延喘偷生之計是該逆不過一

外來窮竄之賊並未與粵洋匪幫糾約合夥該省水師官兵於本

處洋面情形理應熟悉何以蔡逆所到之處粵兵竟不能趕及至

提督李長庚帶領閩省客兵緊蹙入粵於粵洋沙縹自未諸習尙

能緊躡賊蹤奮力攻擊前在沱滴洋面督兵回環剿捕該逆坐船
已被燒毀頭蓬勢窮力竭彼時粵省師船如果幫同合夥將該逆
立時弋獲則功與閩省相埒否則追擊盜船痛加殲戮迅速截回
閩境雖不足言功亦尙可不加責備詎錢夢虎等前次並未與李
長庚跟幫剿捕及蔡逆乘風東竄錢夢虎等總未探明蹤迹示以
兵威以致該逆折竄閩浙來往自如其緝捕不力之咎實無可辭
若云中途遇有另幫盜船設能將鄭一島石二等著名首逆擒獲
亦可將功抵罪乃僅捕獲一二土匪遂以此爲卸責地步藉詞支
飾看來錢夢虎等統領師船總不免在洋觀望於水師疲玩習氣
全未湔改此在備弁微員尙無足深責錢夢虎等以專閩大員統
領水師緝捕是其專責今竟一味因循所司何事錢夢虎著交部
議處該省水師自總兵以下都司以上在事出洋巡緝者著吳熊

光查取職名奏明交部議處以示懲儆至吳熊光身任總督水師雖所統轄但亦止能於沿海口岸督飭調度並無親蒞洋面督率剿捕之責其咎尙有可原吳熊光著加恩免議○丙寅以珠隆阿爲內閣學士

由太僕寺卿遷

○丁卯諭軍機大臣等與奎等奏酌調官兵

相機進剿賊番一摺據稱興奎趕抵大通會晤貢楚克扎布面商剿辦事宜接據巡緝官兵稟報松布地方有賊番二三十名在彼遊奕搶掠當派西甯鎮九十帶兵進剿賊番見官兵趕近先行占據山梁槍箭齊發經官兵衝鋒直上殺斃賊番七名餘始畏懼奔竄見在興奎等卽擬相機進剿大加懲辦等語向來賊番等出沒無常其狡獪伎倆往往乘閒肆劫迨一經官兵剿捕卽時聞風遠颺乃此次輒敢恃強抗敵竟與天兵抗拒甚至憑高恃險槍矢並施其獷悍情形實堪痛恨此皆歷任辦事大臣如台布都爾嘉等

縱容姑息遇事並不認真查辦以致該賊番藐視天威不復心存
畏懼邊圉不靖職此之故見在該將軍督兵進剿所有帶兵大員
前已降旨將格布舍簡放甯夏副都統並令馳驛前往計此時尙
未到彼興奎等應卽迅速行催令其赴營聽用又據另片奏蕭福
祿懇請隨營效力亦著准其前往該二員久歷戎行興奎等應令
督兵前敵庶剿捕尤易得手其所調各兵已共有三千名計賊番
屢出肆擾至多亦不過二三百人兵力十倍於賊聲威不爲不壯
但不可分起前進轉致見單興奎等當整隊督剿以期一鼓集事
該處各番族中其安分守法者業經出示曉諭自不至驚疑滋擾
其敢於抗拒者卽係叛逆不法之徒正可乘此兵威大加掃蕩務
令實在震懾天威再不敢出而滋事方爲一勞永逸之計○己巳
減江蘇婁縣荒田賦則

六月壬申免甘肅野番滋擾之大通縣番民額糧及貢馬銀○石韞玉緣事降調調朱棟爲山東按察使以諸以謙爲河南按察使

由河陝
改道還

○庚辰諭前經降旨令文武大臣年在六十以上者准其

遣人代遞膳牌其六十以下者俱親至宮門呈遞因思親王郡王
爵秩較崇著加恩無論年歲俱准其遣人代遞膳牌如親王郡王
及年逾六十之大臣有自行陳奏事件仍應親遞膳牌以昭敬慎
著將此旨傳諭各親王郡王並著無庸前來謝恩○壬午增

東

陵昌瑞山後汛兵○復河南桐柏等二縣引地歸山西河東行運

○癸未禁直省各督撫幕友捐職奏留本省○甘肅官兵勦卓色
勒番族克之○予故陝甘總督全保祭葬○丙戌諭大學士會同
刑部議奏服制及盜劫案件敕交大學士九卿會議者酌議覈實
辦理一摺向來案關服制罪干斬決之犯情可矜憫者俱援例雙

請嗣於乾隆年間經刑部奏請遇有服制情輕之犯令該督撫按律定擬法司覈覆亦照本條科罪惟將所犯情節實可矜憫者夾籤聲明有奉 特旨改爲監候者有敕交九卿議奏者其劫盜重案則自康熙雍正年間節經奉 旨令大學士會同法司將法無可貸情有可原分別詳議仰維我 聖祖 世宗 皇考立法之初原以明慎用刑凡稍有一綫可原者必周諮博採詳審折衷誠恐該督撫等於定讞時或有畸輕畸重未協情法之平是以集思廣益不厭詳推迄今遵循已久自應仍照舊章若謂會議時視爲具文竟致有名無實輒改歸刑部徑行覈覆不復敕令酌商恐外議又將以刑部之權爲過重矣嗣後服制劫盜案件發交大學士九卿會議者仍著循照舊章務須虛衷商榷斟酌至當如有意見不同者不妨彼此籤商定議具奏若於會議時既隨同畫案旋又

退有後言則是依違遷就一經參奏必當加以懲處至上班時將奏藁宣讀一遍轉似虛文殊可不必此後著卽停止餘依議○己丑吏部議處欽差左都御史周廷棟等參奏山東泰安府知府鳴清承審命案遲延一疏得旨此案知府鳴清於人命重案經屍親具控到府兩次並不提犯親審迨疊赴上司衙門呈控俱批府查訊該府仍不速爲訊辦直遲至九月之久始行親審復藉詞懸宕經年不結以致屍親心懷不服來京控訴發交欽差提集人卷審明定擬結案試思欽差審訊不過一兩旬之間卽將案情質對明確原告輸服無辭並非難辦重獄設該府早爲親訊將案內情節向原告細爲剖析折服其心何至屢控不休是該地方人民來京控案之多皆官司不爲申理所致刁風之長實由於此知府爲方面大員似此因循怠惰非嚴示誡懲不足以儆玩習吏部將鳴清

議以降三級調用伊有加一級抵銷仍降二級內閣照例票擬雙
籤請旨殊屬輕縱此等不以民命爲重惟知尸位偷安之劣員尙
何足惜鳴清著實降三級以京員用其本有加一級不准議抵嗣
後凡命案重情有經呈控到案復由上司批委提訊者若不親爲
審理遲延至半年以上卽著實降三級調用無庸查級議抵內閣
進本時亦無庸票擬雙籤著爲令○癸巳諭本日未刻據都察院
遞奏封事一件朕思必係極緊要重大斷不可遲至明晨之事亟
加披閱止係因飭緝毆死馬得案內兇犯王四卽王勇貴一犯有
王四素識之楊七在香港地方拏獲訊據供稱王四見在潛匿
塔子溝地方請旨飭拏辦理等語實太不成事體朕敷幾勤政日
總萬幾從不稍辭勞勩然封章奏達自有一定時刻大小官員恪
守遵循罔有愆忒設果有非常緊要之事立候施行若稍遲晷刻

已恐貽誤自不能拘泥定制卽中夜奏聞亦無不可此乃絕無僅有之事今都察院未刻陳奏之件其所緝兇犯王四不過尋常闕殿案內脫逃之犯且正犯王四尙未緝獲所獲者不過與王四平日認識之人欲藉以端拏王四作爲眼目且據其所敘供內稱王四於上年六月間逃往口外有伊舊同住之楊三見在塔子溝地方伊在彼潛匿等語王四既係上年六月逃至該處距今已及一年此輩蹤迹何常又安能必其仍在該處是其供吐之語尙難信爲確實何至迫不及待急行入告使外閒以都察院各堂官於晚膳後猶羣詣官門密遞封奏不知因何要事豈不駭人觀聽試思卽軍機大臣可以隨時奏事然若於每日散值之後又復趨詣宮門紛然奏事有是理乎當命軍機大臣傳詢賡音等是何人主見據賡音自稱係伊一人主見因昨晚將楊七拏獲之後尙未訊明

口供今早不及陳奏是以復趕緊訊問於晚膳後呈遞其餘堂官亦皆附和聽從等語朕向來傳膳辦事均有舊規溯自乾隆年間每在宮在園俱於早膳後批閱奏摺召對引見至晚膳後則披閱本章遇巡幸則每日早間啓蹕戒途至行在辦事召對晚膳後仍准奏事卽與在宮在園早膳後無異此外惟驛遞奏摺係隨時呈遞披閱不在此例朕率循皇考舊章罔敢踰越此在廷大小臣工共聞共見者廣音係侍衛處筆帖式出身豈不知晚膳後奏事係行在常規非官廷理事可比今乃漫無區別耶朕勸求庶事日昃不遑卽如晚膳後所閱本章常多至百十件從未嘗以填委爲煩況此次都察院所奏之摺篇幅尙不及本日諭旨之多朕豈倦於披閱但國家定制豈可稍渝試思朕在園駐蹕每傳膳萬壽山玉泉山及閱射布靶皆係豫行傳知從無非時出入之事卽日閒

習射布靶亦止在禁藥幾餘設或於晚膳後忽御出入賢良門較射或傳幸萬壽山等處有何不可然起居無節卽政體攸關朕尙不肯出此況臣工奏事豈可任意遲早自便其私乎廣音年老懶惰平日於應奏事件多不陳奏曾經降旨訓飭茲將此等尋常應奏之件特又趕緊陳奏以見其勤於辦公實則仍爲偷安起見蓋今早該堂官等本在園奏事若此事於明日再奏則該堂官又須早起來園因於本日奏事散後就近在朝房繕摺率行呈遞明晨竟可在家高卧此正其巧於偷安掩飾焉能逃朕洞鑒乎此事係廣音先出主見錯謬已極著交部議處譴祥長琇邵洪陳崇本等隨同附和均著交部察議並將此通諭知之○乙未命京察三等人員不得保送知府

東華續錄

嘉慶二十四

臣王先謙敬編

臣周潤蕃恭校

秋七月壬寅諭軍機大臣等與奎奏剿辦三族賊番一摺據稱伊等帶兵追趕賊番自什噶干至章糰腦兩處殲斃賊五十餘名生擒賊目一名可見番賊無甚伎倆尙易辦理至尖木贊始則詐詐縛獻賊目旣而躲避今又聚眾屯紮實屬可惡見經探明在朱八崖地方自應設法剿辦以示懲創惟摺內稱先將尖木贊剿辦後再折回進剿沙卜浪番族殊未明晰若如所奏豈非置逃往沙卜浪之三族賊番於後路不可不加意防範該處道路情形著繪圖陳奏此次敗殘餘匪旣逃往沙卜浪大族中自須加以剿辦但野番族類眾多止須懾以兵威令其將在逃賊目縛獻即可撤兵斷

無將番賊槩行戮之理與奎等應酌量妥辦○癸卯諭翰林院每逢直日之期將修撰編檢等官輪班帶領引見原係照例奉行其實引見時亦並未加甄別因思乾隆年間本係隔數年後始將翰林等輪帶一周今則竟成常例未免虛應故事嗣後著於每屆恩科正科鄉試之年仍將修撰編檢等官輪班帶領引見朕得識記其人以備簡用其尋常年分不必帶領引見著爲令○甲辰諭吏部奏議處廣音等一摺此次廣音等將尋常陳奏事件率意於晚膳後呈遞貌似急公實則心存怠惰是日該衙門本在園奏事伊等原欲將此事一併陳奏特因早閒具奏不及又慮次日陳奏必須早起赴園是以就近卽在朝房內繕辦奏摺候至晚膳後呈遞既見其勤於辦公又得安心進城明早可以高臥其巧爲偷安實難逃朕洞鑒然使所奏之事果稍關緊要朕不過量加訓飭必

不卽予處分今廣音等所奏止係訪獲緝拏聞毆案犯可作耳目
之人有何緊急立候施行乃紛然羣詣宮門非時入奏殊乖體制
吏部議將謬出主見之左都御史廣音降三級調用因本有革職
留任處分卽行革任其隨同附和之副都御史潤祥等降三級留
任無庸議抵皆屬咎所應得本當照此施行但恐外間無識之徒
不知廣音等以怠惰獲咎但知其陳奏非時致罹降革由是妄生
揣摩或謂天氣暑熱慮朕憚煩託詞仰體將應行陳奏事件亦復
展轉壓閣又涉玩延則大不識朕敕幾勤政之苦心是以格外施
恩曲予寬貸廣音本係侍衛處出身嗣經升任刑部司員擢至刑
部堂官歷來皆係隨眾辦事尙不露短自擢任左都御史後年老
懶惰又不曉事何堪復任臺長廣音著退出左都御史伊於旗務
尙所諸悉著加恩留正藍旗漢軍都統之任所有降三級調用處

分著改爲降二級留任潤祥長琇邵洪陳崇本四人應行降三級
留任處分著改爲降一級留任所有左都御史員缺著宜興補授
宜興未到任之先著德瑛暫行署理○乙巳以故琉球國中山王
尙溫孫灝襲爵命翰林院編修齊鑑工科給事中費錫章往封○
戊申新修 玉牒成○癸丑御史徐國耕奏請敕國史館增輯列
傳並續修天文等志下大學士六部尙書本館總裁議奏尋議歷
代史例以紀傳表志爲綱而列傳內有儒林文苑循吏孝友列女
土司四裔名目我朝文教覃敷允宜哀其事蹟垂示將來至天文
等十四志自雍正十三年以前俱已詳載但成書逾七十餘年亦
應續修均應如所請從之○以常安爲湖北布政使

由烏里雅齊
台參贊大臣

○甲寅移貯

列朝硃筆於太和殿東夾室○乙卯諭昨據都

察院奏御史濟蘭明恆文惠三人數月以來皆因患病不克進署

請旨開缺一摺當經降旨交軍機大臣查明該御史等本年京察等第及患病以來各月分並任內有無條奏事件茲據慶桂等查明開單呈覽朕披閱單內濟蘭等皆自本年正月以來至今未經到署是其患病已久自應據實呈明請假調理乃半年以來僅隨時呈告暫假希冀例不咨部可免開缺明係戀職取巧卽此一節已難勝御史之任至該三員內濟蘭曾經條奏二事俱經部駁不准其明恆所奏請添派員弁護送御寶一事雖經准行亦不得謂之建白至文惠則並無條奏見在旣皆患病屬實豈可濫竽清要惟查該三員年歲均未至衰邁若果調理就愈尙可當差無庸遽予罷斥濟蘭明恆文惠均著將御史開缺仍交部議處俟病痊後著吏部帶領引見候旨若至本年十二月初間尙不能痊本旗具奏候旨至都察院職司風憲豈容有此凜曠之員賡音前在左都

御史任內雖於該三員本年京察等第分別降改尙無不合惟明知其患病日久尙不奏請開缺直至德瑛署任之後始行據實查明辦理可見賡音本人懶散性成焉能正人之怠惰廢弛著交部議處其副都御史潤祥等皆旅進旅退之輩見於德瑛具奏之時止得隨同列銜亦不值交議竟著寬免○戊午 上啓鑾秋獮木蘭○免經過地方額賦十分之三○己未諭軍機大臣等長齡奏兼程赴蘭州接印督催續調各官兵迅剿賊番一摺前據興奎等奏勦辦三族賊番殲擒賊匪多名似已辦有端緒今遲逾數月又經續調官兵迄未辦竣看來尙無把握貢楚克扎布尙未經歷行陣興奎雖曾從戎行但並未統率師干獨當一面恐於剿捕機宜未能深悉長齡曾經督兵勦辦教匪那彥成亦曾帶兵打仗所有剿捕賊番一事長齡馳抵蘭州後察探情形如興奎在彼辦理此

事並無未協卽著長齡那彥成幫同經理貢楚克扎布著回京請訓再赴察哈爾新任若興奎在彼不能得力卽將興奎撤回其勦捕事務責成長齡那彥成專辦伊二人自揣辦理未能裕如不妨奏明另派大員前往會辦以期迅速集事○免直隸安州等十七州縣逋賦○庚申署直隸總督溫承惠奏永定河南岸七汛原設州同州判縣丞七缺北岸八汛僅有縣丞一缺餘皆巡檢主簿嘉慶六年以後北岸情形與南岸無異汛官階級懸殊應酌量就河缺更換以昭慎重下吏部議尋議改武清宛平良鄉固安永清五縣主簿爲縣丞丞霸二州巡檢爲州判分置北岸各汛其玉田元城正定管河縣丞分防南岸之東安武清縣丞均改爲主簿蘭州管河州判霸州淀河州判俱改爲巡檢從之○甲子 上駐蹕避暑山莊○乙丑以江蘇安徽水災命截留江西湖南湖北漕米三

十萬石備糶○以科布多杜爾伯特等出卡游牧烏里雅蘇台將軍成寬籌建卡倫以杜侵占

八月庚辰免四川叛兵滋擾之達縣額賦○乙酉 上自避暑山

莊巡幸木蘭行圍○丙申諭據興奎貢楚克扎布奏派兵往拏尖木贊措置失宜懇請從嚴治罪一摺尖木贊原係種地納糧生番向來辦理番案多用伊爲綫索其素性本屬狡黠此次勦捕賊番興奎等派員前往曉諭令其擒拏賊目尖木贊始而疑懼躲避嗣因通丁往喚尖木贊隨卽來營面見興奎等情願出力旋經引同官兵打仗迨至六月十五日率同番眾潛回復於二十四日率領五族番眾投首並聲明前次因餘賊欲行搶害家口是以馳回照料後因幫貼烏拉運送官糧約於二十八日在甘壩引路進勦沙卜浪番賊屆時如期而至是尖木贊並無違逆情事興奎與眾商

議擬於剿辦番賊蕞事再將尖木贊功過明白宣示所見甚是乃
貢楚克扎布忽於是夜派兵往拏以致尖木贊逃逸無蹤辦理實
屬錯謬試思尖木贊旣已如期投至若果須設法擒拏亦不難於
伊來營時就便拘縛今尖木贊本屬恭順且旣允其隨營自效又
派兵往拏已不足以示信迨至尖木贊乘間逃逸緝捕無蹤又不
足以示威貢楚克扎布如此措置乖謬失信損威實屬咎有應得
著卽革職來京交軍機大臣會同刑部議罪具奏興奎身爲統領
於貢楚克扎布逞臆妄拏之處未能攔阻又未據實參奏亦有不
合交軍機大臣會同行在兵部議處具奏○諭軍機大臣等阿林
保奏舟師過台攻擊朱潰大獲勝仗一摺此次朱潰在大雞籠洋
面遊奕經王得祿督率舟師攻擊奪獲盜船九隻殲斃賊匪多名
頗爲奮勇朱潰係積年盜首若能將該逆擒獲則是海洋除一巨

慈必當渥沛恩施至另片奏蔡逆駛過東獅洋面北竄見在許松
年周國泰孫大剛率師由北而南正可迎頭截擊阿林保當督催
該鎮將等上緊迎剿毋予以暇如能將蔡逆擒獲朕必優加獎賞
○是月河南巡撫馬慧裕奏謝留任得旨汝總以顏檢爲戒以初
彭齡爲法必能永承恩眷爲大員者非一清字所能該括勉思整
飭吏治爲要姑息二字切須痛改勉之

九月己亥朔准浙江前任翰林院侍講梁同書重赴鹿鳴宴賞侍
講學士銜○壬寅諭據成格奏伊族弟清安見補盛京禮部員外
郎請旨回避著交吏部將清安與盛京別部員外等籤掣調補嗣
後盛京五部官員有似此應行回避者卽著與別部掣籤對調著
爲令○諭軍機大臣等興奎奏官兵攻破沙卜浪番族焚毀賊巢
剿捕殆盡並收撫投誠番族一摺沙卜浪人數最多素稱兇橫今

經官兵屢次攻擊擒多名餘匪散竄是番族中之強橫者已加懲創其餘各番眾陸續乞降接踵而至自俱已震懾軍威聞風膽落既知畏法斂戢即可凱撤蕝事興奎等當酌量妥辦勿致稍稽時日至番賊內有蒙古十一人隨同打仗已於擒獲後審明正法所辦甚是仍當通行曉諭青海蒙古王公扎薩克等以爾等自

世宗憲皇帝年間輸誠納款列入版圖世荷豢養至優極渥大皇帝嘉爾恭順是以每遇番族擾及輒徵調官兵驅逐不惜帑金皆係因惠愛蒙古曲加保護爾蒙古具有天良方感戴之不遑何至去而從賊乃此次剿捕番族竟有蒙古在內訊係攜眷投入或被掠入夥均隨同打仗殊出情理之外該王公等失察之咎無可解免本應予以懲處俾知儆戒今蒙大皇帝格外施恩俯念爾等係糊塗蒙古且從賊之犯必係爾等屬下尤爲不肖者已將該犯等

訊明正法將爾等失察罪愆從寬免議爾等當知感愧嚴行管束
屬下人等務各安分守法長此蒙恩儻復滋事必當分別治罪不
能再恕其各懍遵毋忽又據稱尖木贊逃往竹林壩一帶老林藏
匿興奎等既探明蹤迹卽當曉諭降番令其將伊獻出以憑嚴辦
○甲辰福州將軍賽冲阿奏官兵在雞籠洋截剿朱潰大獲勝仗
得旨嘉獎○丙午 上駐蹕避暑山莊○丁未賜暹羅國王鄭華
敕諭曰嘉慶十二年九月據兩廣總督吳熊光奏稱有船商金協
順陳激發裝載暹羅國貨物來粵貿易並請於起貨後裝載粵省
貨物同赴暹羅經地方官查明金協順係福建同安縣人陳激發
係廣東澄海縣人飭傳暹羅國貢使丕雅史滑釐詢問據稱金協
順陳激發二船委係由該國新造來粵因該國民人不諳營運是
以多僱福潮船戶代駕並冒捏呈遞譯書稟結等情天朝綏懷藩

服准令外域民人赴內地懋遷貨物惠遠遠人恩至渥也惟是中外之限申畫釐然設關議禁古有明訓我朝撫御諸邦如朝鮮越南琉球等國各以本地物產來中土貿易皆係其本國民人附朝貢之便齎帶前來從未有中國之人代彼經紀者今金協順陳澂發以閩廣商民代暹羅營運卽屬違禁中土良民謹守法度斷不敢越制牟利其私涉外域者此中良莠不齊設將販運貨物隱匿拖欠致啓訟端亦於該國諸多未便本應將金協順等飭拏治罪念其船隻係由該國製造給令代駕從前未經嚴立科條此次且從寬免究並施恩准其起貨售兌仍給照令其置貨同帆特降敕諭知該國王宣明例禁嗣後該國王如有自置貨船務用本國人管駕專差官目帶領同來以爲信驗不得再交中國民人營運若經此次敕禁之後仍有私交內地商民冒託往來者經關津官吏

人等查出除不准進口起貨外仍將該奸商治罪該國王亦難辭
違例之咎柔遠能邇寬既往以示含宏之義宅中馭外申明禁以
嚴踰越之防爾國王其懍遵毋忽特諭○以方受疇爲直隸布政
使調素納爲直隸按察使以陳祁爲陝西按察使由陝安道遷○辛亥

上自避暑山莊回鑾○諭溫承惠等奏浚津隄河各工告成恭

請鑾輿巡視一摺浚津隄河各工關繫畿輔水利我 皇考高宗

純皇帝法駕頻臨 躬親周覽舉凡宣防要術悉秉 睿謨爲億

姓之所利賴自嘉慶六年雨水過多隄河間有衝潰特發內府帑

金六十萬兩飭令鳩工疏治用以保護民舍田廬俾得安瀾永慶

茲因修築竣事署總督溫承惠學政劉鏞之提督色克通阿鹽政

李如枚合詞籲懇請於來春鑾輿巡視自應俯如所請敬紹 先

謨省方敷治著詎吉於明春三月初五日啓蹕恭謁 東陵取道

南苑巡幸淀津四月初二日還宮所有一切事宜著各該衙門查照向例先期豫備○甲寅 上閱古北口兵○諭興奎等奏查番族震懾軍威投誠歸命並番目尖木贊來營投首邊境教甯一摺覽奏俱悉番眾賦性蠢頑間有一二匪徒鼠竊狗偷搶掠牲獸向所不免乃本年春夏之間該番賊等竟敢肆意攘奪擾及邊民爲害行旅實屬孽由自作罪不容誅是以調集官兵頒發帑項飭令聲罪致討經官兵節次攻擊殲擒賊犯多名該番眾等畏懼乞降聞風踵至其沙卜浪一族在番眾中最爲強悍官兵痛加殲戮焚毀賊巢該番族喪膽驚魂頭目完木古等懇乞大喇嘛諾爾布帶領詣營投首乞命頂經發誓不敢再滋事端並據該喇嘛出具甘結保狀是該番眾畏威悔罪實出至誠前經疊降諭旨以番眾良莠不一務須分別勦撫原不欲羣庭埽穴將番族悉予殲除今旣

震懾投誠自應法外施仁寬其一綫仍著興奎等諭令延嘉呼圖克圖等向番眾明白曉示自此次曲從寬貸之後務各安分守法儼再作奸犯科必當重加懲辦至番目尖木贊因從前屢次辦理番案富差出力曾經賞給翎頂身受厚恩此次賊番滋擾理宜力圖報稱乃始則隨營效力繼又乘閒脫逃雖據興奎等傳訊該番目幫貼烏拉運送糧餉並無叛逆情事卽伊姪才楞所供該番目豫備抗拒官兵分受贓物等事亦訊係挾嫌污蔑止因貢楚克扎布輕聽浮言妄行捕捉是以避匿遠颺但該番目旣自問並無罪愆於貢楚克扎布派兵往拏時卽應自行投案何至遽行逃遁本應褫革示懲姑念其旋卽來營著從寬摘取翎支降爲七品頂帶仍令其照舊當差並傳知該番目嗣後如果倍加感奮管束各番眾安靜斂戢二三年後仍當奏請恩施賞換翎頂若再不知愧勉

致番眾故智復萌或有滋擾情事即將伊從嚴治罪決不姑貸此時番境甯輯邊塞肅清前調官兵即可全行凱撤興奎長齡那彥成於旋抵貴德籌議善後章程後即著各回本任興奎自調赴西甯督辦軍務尙爲妥協本應加以獎敘惟伊於貢楚克扎布妄擊尖木贊一事不能阻止又不據實劾參實有應得之咎前已有旨令軍機大臣會同行在兵部議處具奏當經軍機大臣等議以革職曾令於軍務告歲時再行覈辦茲念其帶兵出力功過尙足相抵著加恩免其革職無庸交部議敘長齡那彥成均馳抵軍營未久旋即竣事亦無庸交部議敘○實授溫承惠直隸總督○丙辰

上還京師○己未諭軍機大臣等吳璥奏請疏挑微山湖上游

牛頭河以裕蓄蓄一摺微湖蓄水向賴牛頭河所受各州縣被水

由南陽昭陽二湖灌輸方能充沛今據查牛頭河淤塞不通此係

微湖受病之由不可不趕緊疏濬吳璥歷查舊案奏請興辦自應如所議行惟據另片奏稱該河自淤塞之後魚蠹瀕湖矜民多有占種湖灘視爲恆產一經挑通則湖灘不能耕種遂以該邑地處下游恐成澤國控阻等語挑挖牛頭河堵蓄湖水關係濟漕要務豈得因刁民控阻因循不辦著吳璥會同該撫示諭居民以地方辦理公事爲國卽以爲民斷無因爾等貪圖小利置公事於不辦之理况牛頭河係百年來舊有之河從前深通卽未淹及該縣見在淤塞之後不敷濟運關係綦重爾等濱河灘地本非應行耕種之區卽間有被淹於閩邑民田毫無干涉而上游之濟甯金鄉等處積水轉得疏消實爲有利無害此時事在必行斷不能徇爾等之請如此明白曉諭居民等自不至仍前阻撓吳璥卽會同該撫派委妥員估計興工無致有草率虛冒之弊○命嗣後遠支宗室

總族長照近支例以王公充補○辛酉諭上年直隸省州縣勾串
司書侵吞庫項一案當經降旨以各犯侵盜之多寡定罪名之輕
重將侵銀二萬兩以上者立置重典侵銀一萬兩以上者亦於上
年秋審予以勾決尙有侵在一萬兩以下之陳錫鈺等五犯亦俱
問擬斬候入於本年秋審情實辦理各該犯串通書吏肆意侵吞
其蒙蔽分肥情節均屬罪無可追特以朕上年定讞此案悉遵照
從前 皇考高宗純皇帝辦理甘肅捏災冒賑之例分別問擬查
前此捏冒案內侵銀不及一萬兩之各官犯四十餘名亦經刑部
問擬情實均蒙 皇考法外施仁免死發遣茲陳錫鈺等情罪與
前案相類亦尙可寬以一綫所有直隸省侵帑案內各官犯除徐
承勳一名業經病故外陳錫鈺馬河戴書培魏廷鑑四犯著加恩
免其勾決發往黑龍江充當苦差此乃朕祇遙 前謨於無可寬

貸之中曲爲賁宥嗣後各省州縣等益當激發天良奉公守法毋謂寬典之可屢邀也○壬戌諭軍機大臣等伯麟奏緬甸遣使投文懇求援助遵旨曉諭該國王一摺所辦甚是天朝撫綏外藩一視同仁斷無偏助之理緬甸與暹羅同列藩服彼此稱兵構釁疊觸相爭惟當置之不問若此時允緬甸之請遽爲出兵援助設暹羅亦復遣使敏關求救彼時又將何以處之伯麟遵奉前旨於該國王遣孟幹投文之時卽行明白曉諭並將從前刀派功私帶兵練出境本屬有罪之人禍由自取不能因一越境滋事之土司與師問罪其召三並非天朝會賞官職之人此時被戛於腊歷逐入山無庸過問所駁詞嚴義正甚爲得體諒該國接此照會自未敢再行漬求至摺內稱探聞九龍江車里土司之堂弟刀永和竄至緬甸該國欲將刀永和送回九龍江仍充土司等語刀永和係謀

殺士弁刀太昌案內逕犯此特或卽係該犯在彼布散謠言希圖
構釁亦未可定如果見在緬甸自應將該犯罪案緣由飭知該國
王令其縛獻以便按法懲治○甲子諭馬慧裕奏魯山安陽兩邑
士民呈請爲已革知縣吳昭捐復原官據情代奏一摺所奏非是
吳昭前在河南安陽縣任內因審案草率革職後發往烏魯木齊
其罪本無可貸彼時因馬慧裕奏稱該員居官素好有該邑士民
呈請代爲贖罪特經降旨允准已屬格外施恩今該撫又以魯山
安陽兩邑士民愛戴該員代爲具呈捐復率行據情入告希冀恩
准實屬不成政體官員革職開復自有定例非地方民人所得干
與若因該士民之請動輒准行是在任者既可因訐告而去官而
離任者又可因代捐而復任官職之去留小民得持其長短國家
予奪之權安在馬慧裕係進士出身庶人不議一語會未知耶此

卽官員等平日實有政聲輿情愛戴真切尙不可行况外省不肖劣員工於作僞或平日與地方紳衿往來交結及其緣事罷斥紳衿等遂爲之設法營救計出於此亦未可知不可不防其漸總由馬慧裕平日辦事疲輒接據此等呈詞不行駁斥轉爲之具摺申請所奏斷不可行馬慧裕著傳旨嚴行申飭○閩浙總督阿林保奏請將温州府樂清縣屬外洋東白等六山改隸玉環廳版圖洋面歸玉環管轄下部議行○乙丑嚴禁八旗抱養民子爲嗣紊亂旗籍○丁卯諭本日德文李鈞簡奏請挑修張家灣正河以復運道一摺據稱運河到處流沙不能建設閘座全賴河形彎曲蓄水濟運今康家溝水一直下注北高南下本年暫用濟運已多溜激坎阻等事請於十月內擇吉興工挑修張家灣正河堵築康家溝抄河以資經久等語自係實在情形著溫承惠迅卽委員估勘

勤項興工務於年內趕完俾新漕得以暢行無阻○復鐵保一品頂帶花翎

冬十月庚午改湖南古丈坪都司歸提督專轄○癸酉禁民人私入番地及蒙古人改用番子服色並清查戶口○辛巳諭副都御史潤祥條奏請於御門之日准令通政使以下三品京堂一體侍班一招所奏非是御門聽政乃相沿舊典其列名進本及應行侍班陪奏之員於讀本宣旨時均已退班惟大學士等數人面承諭旨此外各員並不與聞今該副都御史請令通政使以下三品京堂一體入侍以爲於勤政有裨是則徒務虛文而已朕日理萬幾勤求宵旰並非專待御門之期始綜理庶務況前經降旨諭令御門之日各部院衙門俱仍照常承辦無庸推班若三品京堂等有應行陳奏事件卽是日並不侍班原可具摺入告豈增一侍班卽

爲勤政乎且京堂內尙有四五品者仍未一體侍班殊不畫一若
槩令入侍則御園規制與宮內寬狹不同勢不能令京堂各員儘
數羅列該副都御史所奏不可行著無庸議○撥龍江西新關稅
十萬兩於江蘇備賑○乙酉濬直隸南運河分洩各減河○庚寅
諭朕本日至承光殿傳膳辦事各部院衙門惟長麟因謝恩遞摺
祿康文甯明亮等因該旗值日陳遞無事奏片其餘無一奏事者
當於召對長麟時加以詢問據稱本日因恭移 實錄 聖訓至
皇史宬尊藏之第一日典禮吉期是以內閣刑部將刑名章奏均
敬謹回遑等語皇史宬安奉 實錄 聖訓禮節固屬重大但非
慶典吉辰可比亦惟當停進立決章奏其餘案件皆應奏聞若似
此務取吉祥動行回避庶政豈不多所曠誤乎且本日除刑部外
其餘各部院又有何回避不奏之故明係怠惰偷安憚於早作夙

夜匪懈以事一人諸臣竟弗知乎朕一日萬幾罔敢暇逸凡有臨
莅之處批章召對與在宮內無異近年屢因諸臣於朕偶有臨莅
之處不行奏事節次訓飭並加以懲處諄諄教誡實已至再至三
而諸臣積習相循一味自耽安逸轉似恐朕躬煩勞託爲仰體此
正巧於偷安罔知振作者朕冬閒臨莅各處皆係年例應往並非
無事游觀朕若日事嬉游樂而忘返諸臣尙應諫阻豈可先自偷
安是逢君矣况瀛臺三海等處俱在皇城之內往返不過數刻如
每次皆停止奏事則積壓繁多轉形叢脞成何事體在京各部院
衙門咫尺禁廷尙且相率怠惰不知勤勉又何况外省效尤滋甚
於地方民事率皆疲玩不辦乎本日除內廷行走各大臣及到彼
執事遞摺各員外其餘各部院堂官均著傳旨申飭並令伊等捫
心自問果否無一應奏之事亦各知愧怍乎若將來再不悛改仍

前怠玩必當嚴處不貸○辛卯加長麟恭阿拉太子太保○甲午以貴慶爲內閣學士由詹事遷○乙未罷武鄉會試內場策論改令默寫武經

十一月辛丑諭軍機大臣等鐵保等奏查勘南北兩岸黃水歸海去路籌堵陳家浦仍疏挑正河情形一摺並繪圖貼說進呈朕詳加披閱南岸陳家浦下游射陽湖一帶清水別無分洩去路不能再容全黃下注勢難就此導黃歸海其北岸仙湖迤下由灌河歸海一路雖施工較南岸爲易但需銀至三四百萬兩之多兼之曠日持久一時未能竣事自不若堵閉陳家浦挽歸正河爲正辦鐵保等擬於陳家浦河面較窄之處建築壩基進占堵築使黃水仍歸故道旣據稱辦理較有把握覈計需費在一百二三十萬兩上下卽著定議疏築趁此冬令興工務於新正趨辦完竣俾尾閘宣

洩深通方爲妥善所需銀兩卽照所請著該部在河南山東等省
附近藩庫及江安兩省各關庫先行籌撥銀一百萬兩解工應用
該督等竟應一人常駐工所督率工員一面挑挖正河一面購備
物料認真覈實妥速辦理爲要又據另片奏堰圩壩場工段分投
鑲護等語堰圩堤壩各工隨時搶鑲撲護何至竟全行壩場卽因
疊次暴風猛烈人力難施但工段亦有新舊之別何以摺內未據
聲敘明晰迹涉蒙混如壩場係屬舊工已在保固例限以外尙有
可原若係新作工段旋即壩場則是從前興修時偷減工料未能
砌築堅實情弊顯然卽應賠罰示懲鐵保等當詳查壩場處所分
別新舊工段先行據實具奏仍一面速飭工員趕緊鑲護並採購
石料以備新春砌補俾資保衛○壬寅朝鮮國王李玢懇處其國
與邊民私市之商人並繳貨物 上嘉其恭順優資之○癸卯諭

皇史宬建自前明四周石室中藏金匱我朝自定鼎以來因其舊制尊藏五廟實錄聖訓寶帙琅函以次排列茲恭編皇考高宗純皇帝實錄聖訓告成卷帙增倍特命所司重加修葺將金匱分列石臺詠吉尊藏朕躬親瞻禮敬念我國家列聖相承六朝謨烈振古鐸今億萬斯年篤祐延釐正未有艾嗣後石室排列充盈卽著於兩配殿倣照石室規制敬謹建造分貯奕葉遵循永遠無替將此旨交內閣敬謹存記○甲辰天壇齋宮災○乙巳諭朕昨日詣瀛臺傳膳辦事惟步軍統領奏事及值日之前鋒統領護軍統領等遞無事片其餘部院各衙門並無陳奏事件當於召見軍機大臣時詢及據稱是日恭請玉牒至大內恭閱並送往皇史宬尊藏在京文武大臣均應齊集迎送等語迎送玉牒一事乃典禮攸關臣工等理宜敬謹齊集然各該管衙門果

有應行陳奏事件卽當權其緩急不得以分應齊集遂致延閣要務若該員等本無應奏之事自應躬親迎送用昭鉅典爰命戴衛亨托津前赴協和門逐一詳查開單呈覽齊集迎送者甚屬寥寥朕勤求治理惟日孜孜節經降旨訓諭飭令臣工等勉思無曠庶官夙夜匪懈之義丁甯告戒不啻至再至三詎積習尙未滿除止圖安逸試令清夜捫心自問能無愧乎此而不加之懲處何以儆怠玩而肅官方因復命軍機大臣將未經齊集各員查明有無事故分晰開單具奏茲據查明文職大學士以下五品京堂以上武職都統副都統各員將迎送已到及有事未到無故不到者分別開單進呈除已到各員名單內大學士祿康等二十七員均無庸議外其有事未到名單內大學士費淳等二十七員或見有別項差使或見居服制均可不必置議此內惟宜興一員據稱因放皮

襖賞未到監放皮襖賞共派拉旺多爾濟祿康宜興英和四人祿康是日卽先至齊集處所拉旺多爾濟英和俱於隨往瀛臺後始往監賞可見宜興係屬藉詞卸過至無故不到各員名單內尙書鄒炳泰等或指稱患病或稱批本審案或稱收本閱卷或稱挑甲辦書俱係託詞支飾宜興著與鄒炳泰等三十九員交吏部兵部都察院一併議處嗣後遇有壇廟祭祀及朝會大典除實有差使及值班奏事各員不能分身前往外如有無故偷安不到者一經查出均著照例議處在廷諸臣經此番訓懲之後當共知儆惕痛改從前怠惰積習以副朕整飭教誡至意○己酉諭向來辦理刑名案件由該部審明後會同法司覆審定擬罪名及至朝審時復令九卿科道等集議委無絲毫疑竇情罪允當始定爰書由本道御史三覆奏始題請句到而罪囚有臨刑呼冤者仍准覆加

鞠訊原以綜理庶獄不厭精詳於明罰敕法之中寓矜慎欽恤之意立法至爲周備昨朝審勾到據監刑侍郎廣興等具奏絞犯鍾寬於臨刑時極口呼冤據供並無扶鸞收徒情事前係番役誣賴在部亦未畫供是以未將該犯處決奏聞請旨等語朕以該犯既心未折服或案情竟未確實不可不覆加研鞠當經特派未經審辦此案之大學士慶桂等詳加提訊如該犯所供屬實自當昭雪其冤並將原審及妄拏官役參奏懲治儻係妄供狡展卽當加重治罪茲據慶桂等奏提集犯證逐一研訊審明該犯扶鸞傳呪並姦拐葛氏詭取法名葛氏之子官兒年甫十三所習呪語尙能記誦並稱該犯爲師祖其乩架符呪等件該犯妻妾供證確鑿從前步軍統領衙門並未妄拏該犯在部時自行手印供詞實之同監人犯並無按指印模之事是該犯擬絞予勾本屬情真罪當且於

法司會審及九卿等朝審時俱俯首認罪並無一言及至鄉赴市曹忽鳴冤抑是其挾詐逞刁止圖苟延旦夕國家決囚重典執法懲奸與眾共棄乃以毫無屈抑輒敢肆意呼冤妄希狡展實出情理之外若似此紛紛效尤尙復成何政體自應加等懲辦以昭炯戒今慶桂等議請將該犯改爲斬立決應如所議辦理鍾寬一犯著先責四十板卽行正法仍派廣興秦瀛前往監視行刑並著對眾宣示以該犯鍾寬所犯罪狀如止係姦拐其罪尙不至死原以該犯在輦轂之下假託扶鸞念咒惑眾傳徒刑部照左道惑人爲首律問擬絞候入於本年秋審情實至朝審句到日覈其情罪法無可追是以予勾該犯又於鄉赴市曹後極口呼冤經特派大臣覆訊案情確鑿與原供無異該犯居心狡詐妄希倖免刑誅並非真有冤抑因加重改擬斬決並先重責四十板立正典刑特明白

宣諭俾眾人共見共聞平日各知守分畏法若身罹刑憲非說詞
狡展可以倖逃也朕聞朝審漸成具文九卿科道亦未必全到卽
全到亦不發一言若有一人駁改一案者羣起而攻目爲多事此
習至惡各宜痛改無負國恩而虛大典朕非喜多事之人但深恨
摸稜之輩耳嗣後內外問刑各衙門益當思人命至重雖至獄成
處決時苟稍涉疑竇尙必爲之推鞫斷不肯稍有屈抑當承審重
案之初卽應倍加詳慎務令罪人心口帖服方爲信讞設再遇有
臨刑呼冤之犯仍應奏明重加詳勘果有覆盆之冤必立爲申雪
將原審官照例懲治如係奸譎之徒罰當其辜而妄行翻異冀延
顯戮亦必照此加等治罪以懲刁頑將此通諭知之○甲子諭朕
閱平定三省邪匪方略內原任協辦大學士湖廣總督耆麟前在
軍營因見軍務厯時未竣心懷焦急臨戎涉險奮不顧身以致積

勞病逝至今猶爲惻然因命交部旗查明伊身後有無賠項卽行具奏茲據查奏該故員前在雲貴湖廣總督任內分賠攤賠各款除先於伊子吉郎阿伊姪素納名下扣繳不計外尙有未完銀二千零五十兩又本年積據滇省咨追分賠銅價銀二款共銀一千四百六十五兩覈其款項均係代賠屬員無著虧缺及因公攤賠銀兩非本任虧短者可比所有書麟名下未完賠項著加恩全行寬免無庸再於伊子伊姪名下扣繳以示朕軫念盡臣追加恩卹至意○丙寅定漢教習三年考試例○王綬以病解任轉萬承風爲禮部左侍郎調戴聯奎爲禮部右侍郎轉邵自昌爲兵部左侍郎以阮元爲兵部右侍郎

十二月癸酉諭朕披閱勦平三省邪匪方略內載慶成自派往軍營後隨同帶兵尙屬奮勉並帶有舊傷是以節次加恩用至將軍

伊上年陛見來京朕於召對時詢以曾否賞帶雙眼花翎原因其從征有年素著勞績欲俟詢問明確後優予恩施不料伊希圖蒙混妄稱曾經賞給竟自蹈欺飾之咎特將伊遣戍示懲本年復經加恩賞給藍翎侍衛授爲圍場總管今追溯前勞念其獲咎之由止爲急於邀恩起見尙非必不可原慶成著格外加恩賞給二等侍衛仍充圍場總管以示朕獎勵戎行有功必錄至意○諭朕披閱剿平三省邪匪方略從前湖北辦理軍需該督撫任聽局員濫支濫應而於餉項缺乏之際又不肯據實陳奏輒以通融辦理爲能嘉慶五年閒朕因該省久未請餉曾經降旨詢問並不待該省奏請卽行頒發餉銀撥給鄰省米石截留漕糧俾資接濟彼時倭什布於糧餉撥到之後又不以時給發遂致兵勇等向民間勒索任意滋擾幾致貽誤經朕降旨將倭什布革職逮問大加整飭而

昨據汪志伊章煦奏到湖北省積年未清倉庫錢糧摺內敘稱各州縣見在缺短之數多至六十八萬餘兩聲明致虧之由係因承辦軍需積欠賠墊是彼時伊等所謂通融辦理者不過將倉庫錢糧任意那用其閒浮支濫應無所不有皆係取給於此今計算節次所發湖北餉銀不啻數千萬兩見在查覈倉庫又復因此虧缺在見任各員皆係接收厯任交代尙非本任虧短將來不過責令分賠已足示懲至從前經手之員率意那移帑項其咎甚重非僅著落賠補即可免罪著交汪志伊等查明彼時經手各員除劣蹟昭著如胡齊崙業經抵法外其見在該省各員如有承辦軍需擅動倉庫虧缺數多爲眾所共知者著汪志伊等秉公確覈卽行指名參奏治罪以示懲儆○丙子諭本年屆應舉行軍政之期兵部將在京之都統護軍統領副都統左右翼總兵鑾儀使內務府護

軍統領在外之駐防將軍都統副都統領隊大臣提督總兵分晰開繕履歷清單進呈朕詳加披閱內盛京將軍富俊自簡任以來潔己奉公辦理地方諸務俱能認真於所屬營伍亦能勤加訓練前年朕恭詣盛京祇謁祖陵又閱二載該處地方情形甚爲甯帖自由該將軍經理得宜所致著加恩交部議敘西安將軍德楞泰因上年辦理甯陝叛匪事宜未能妥協革職留任八年無過方准開復見在已閱年餘陝省地方極爲安輯所有伊革職留任處分著加恩開復伊犁將軍松筠簡授迄今六載安詳鎮靜邊境救甯伊前在尙書任內本會加賞宮銜嗣經緣事革退茲仍加恩賞給太子少保銜副都統豐紳殷德前會賞給公銜因被奎福控告止有一款屬實其餘重款皆虛當經革去公銜仍留三品輕車都尉上年復擢任副都統已及一載伊係固倫和孝公主額駙著加

恩賞給伯爵銜副都統扎爾歡阿爾綱阿俱年逾六旬人亦平庸著以原品休致餘俱照舊供職○癸未以周興岱爲兵部右侍郎馬慧裕爲內閣學士調清安泰爲河南巡撫以阮元爲浙江巡撫

由兵部右侍郎遷

○己丑章煦請假葬親以董教增署湖北巡撫鄂雲布

護理安徽巡撫

由布政使署

○是歲琉球朝鮮南掌入貢○會計天下

民穀數各省通共大小男婦三萬三千八百六萬二千四百三十九名口各省通共存倉米穀三千二十一萬八千一百八十二石三升五合九勺